

續文獻通考

卷九之四十一

二	漢書門
四	
三	
一	
八	類
一	號
三	函
一	架


九	內閣文庫
四	漢書
一	
三	
架	類
冊	號
一	函

內閣文庫	
番號	漢 2431
冊數	81 (14)
函號	294 13

國用

漕運

海運





A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





續文獻通考卷二十九

淺草文庫

皇明進士雲間王圻纂輯

國用考 漕運下

淮安運道

自漢以來即有高家堰在淮安之東南永樂間通淮河
為運道築堤堰上以防淮水東侵又自府北鑿河蓄諸
湖水南接清口凡六十里曰清江浦乃運船由江入淮
之道建清江等閘遞互啓閉又築土壩以遏水勢後閘
壩禁弛河渠淤塞 嘉靖八年疏治復舊隆慶中高家
堰廢淮水由黃浦口決入漫衍民田 萬曆四年開草
灣河渠長六十二里分殺黃河以緩清口之衝 七年

續文獻通考

馬

復築高堰起新莊至越城長一萬八百七十餘丈堰成
 淮水復由清口會黃河入海而黃浦不復衝決又以通
 濟開逼近淮河舊址坍塌改建於甘羅城北仍改濬河
 口斜向西南使黃水不得直射因廢拆新莊閘又改福
 興閘於壽州廠適中處所共清江板閘照舊增修又議
 修復五壩惟信字壩久廢不用智禮二壩加築仍舊車
 盤船隻仁義二壩與清江州相隣恐有衝浸移築天妃
 閘內八年用石包砌高一丈九年又於府城南運河
 之旁自窯灣楊家澗歷武六墩開新河一道長四十五
 里曰永濟河因置三閘以備清江浦之險十一年建
 清江浦外河在堤長二里磯嘴七座又建西橋石堤長

九十八丈以備淮河之衝

揚州高寶運道

自清口引淮為清江浦至烏沙河匯管家白馬二河堤
 黃浦八淺及寶應縣槐角樓南諸湖相接西抵泗州盱
 眙縣界皆運道所經湖東有堤長三十餘里洪武九
 年用磚修高家潭等處成化二十一年造石堤漸修
 至二十餘里其南高郵邵伯等湖皆有石堤運船觸堤
 往往敗溺弘治三年命官於高郵河迤東開新河
 以避其險白康濟河中為園田南北置閘以時啓閉兩
 岸俱甃以石嘉靖五年題准於汜光湖東傍舊堤開
 新河長三十里遂棄康濟河又寶應至界首凡有溝可

通注於海者造平水閘十座 十年又自寶應湖東築
月堤長二十一里 萬曆五年淮水由黃浦口決入石
堤多壞 七年 命官修築改建減水閘四座加高閘
石九座自是寶應諸河堤岸相接 十二年題准於石
堤之東傍堤開新河三十餘里以避槐角樓一帶之險
曰弘濟河

憲宗成化中總理河道侍郎王恕疏論淮揚一帶河道南
臨大江北抵長淮別無泉源止藉高郵邵伯等湖所積
雨水接濟湖面雖與河身相等而河身比之湖面頗高
每遇旱乾湖水消耗則河輒淺澁不能行舟若將河身
比湖身濬深三尺則湖水自來河水自深雖遇旱乾亦

不阻船前項海道自南至北四百五十餘里中間險深
闊不能挑濬外其淺窄可挑濬去處尚有二百餘里約
用九萬餘人人六十工可完每人日給口糧二升該用
糧米一十萬八千餘石捲掃打壩共用椿木一萬六千
餘根草二十萬餘束高郵湖自杭家嘴至張家溝南北
三十餘里每遇西風大作波濤洶湧損壞船隻失落錢
糧人命不可勝記前項堤岸之外地勢頗低若再濬深
三尺闊十二丈起土以爲外堤就將內堤原有減水閘
三座改作通水橋洞接引湖水以內行舟仍於外堤造
減水閘三座以節水利雖遇風濤亦無前患若興此役
約用二萬三千餘人人六十工可完每人日給口糧二

升該用糧米一萬五千六百餘石合用築堤樁木五萬四千餘根草二十七萬餘束造水閘并改造通水橋洞磚石等料并工價銀二百餘兩又揚州灣頭鎮迤東河道內通泰等四州縣二千戶所富安等二十四鹽場其間有魚鹽柴草之利在前河道疏通之時二千戶所運糧船隻俱在本所修船客商引鹽裝至儀真每引船錢不過用銀四五分揚州柴草每束止賣銅錢二三文近年以來河道淤淺加以天旱河水乾斷舟楫不通鹽魚柴米等項俱用旱車裝載二所運糧船隻不得回還本所牛車脚費柴米價高以致客商失陷本錢軍民難以過日前項河道自灣頭起至通州白浦止三百四十餘

里俱用挑閘八丈深三尺約用八萬五千六百餘人六十工可完每人日給口糧二升該用米十萬二千七百九十餘石雷公上下塘句城塘陳公塘俱係漢唐以來古跡各有放水減水閘座年久坍塌遺址尚存近年止是打造土壩攔水隨修隨塌不能蓄積水利若每塘修造板閘一座減水閘二座潦則減水不致衝決塘岸旱則放水得以接濟運河以上四塘造放水板閘四座減水閘八座約費價銀二千餘兩雜工止用各塘見在人夫不必勞民動衆若從臣請庶幾舟楫流通永爲軍民無窮之利矣

儀真瓜洲運道

儀真上下江口及瓜洲便河皆由江達淮運道襟喉宋時儀真嘗建三閘洪武中即其地築為壩弘治元年始建東關羅泗二閘十二年復於濱江建攔潮閘嘉靖五年題准潮長開閘放船潮退盤壩不許候閘延久萬曆四年於朱輝港鑰匙河清江等處各開河以便停泊

瓜洲江口舊建土壩江北糧船空回撤壩以出而江南重船反令盤壩搬剝艱難風濤守候隆慶六年題准自時家洲以達花園港開渠六里有奇建瓜洲通江閘二座自此漕艘始免車盤之苦萬曆四年於瓜洲開港塢以泊運船

丹陽運道

常州至丹陽河道淺淤歲費工力開挑嘉靖十九年夏四月丹陽道淤漕舟由孟瀆渡江江陰大盜黃良秦璠劫舟粟七艘殺運卒數百人執捕官繫檣竿射殺之南科以聞上曰江寇猖獗守土巡江官職謂何令奪俸置理有差

置閘始末

漕河之閘起徐州迤北至臨清七百里置閘四十有四曰會通閘曰臨清閘曰板閘曰新開上閘曰戴家灣閘曰上橋閘曰梁家鄉閘曰七級二閘曰阿城二閘曰荆門閘曰安山閘曰開河閘曰南旺北閘曰南旺南閘曰

永通閘曰焚閘曰上新閘曰下新閘曰天井閘曰在城
閘曰趙村閘曰石佛閘曰新店閘曰新閘曰仲家淺閘
曰隨家淺閘曰魯橋閘曰棗林閘曰南陽閘曰廣運閘
曰谷亭閘曰八里灣閘曰孟陽泊閘曰胡陵城閘曰飛
雲橋閘曰金清口閘曰沽頭上閘曰謝溝閘曰新興閘
曰黃家閘自元朝者二十餘 國家自永樂至嘉靖年
間先後增置者二十餘而減水月河通湖諸閘不與焉
然歲久變遷有名存而實亡者矣

徐呂二洪

徐州洪在徐州爲運河要害亂石峭立凡百餘步故又
名百步洪 成化四年 命官鑿石以利舟楫又甃石

路長一百三十丈以便牽挽 二十年置石壩長八十
丈遇有損壞管河官隨時修築 嘉靖二十年於洪下
置石閘一座

按二洪必自黃河而流始大正統戊辰河決滎澤孫家
渡南徙衝張秋鎮二洪僅受閘河之水不可以舟廼議
從河南懷慶府武陵縣導沁水下入梁靖口以濟二洪
正統初叅將湯節因洪水淺急數損運舟議於洪築堰
遏水盡歸月河徐州洪則於南口呂梁洪則於上下二
口各建閘積水以行舟未幾閘廢迄今天旱水澁卽築
攔河壩遏流入內洪亦建閘遺意也顧水勢日淺澁至
嘉靖甲午春二洪幾不通舟是年秋黃河決夏邑經蕭

縣城南以合梁靖之流出小浮橋二洪遂得濟即今梁靖之流亦甚微而蕭縣城南之口亦阻山甚狹通塞靡常然則建閘之法不可不預講也或曰二洪之後皆可開月河以建閘如月河各以石砌堅而修閘以時啓閉盛則由洪澁則由閘亦永久之利也如是則二洪之險失矣但山脉皆堅石所費良不貲爾二洪役夫必藉險以規利考役夫歲費二萬緡如出數歲之費以鑿之亦一計也 呂梁洪在徐州東南六十里有上下二洪相距七里亦運河要害 成化八年 命官甃二石堤共長七十餘丈 十六年 命官築石壩長一百六十五丈復於壩西築堤二十餘丈洪東甃石路四百二十丈

遇有損壞管河官隨時修築 嘉靖二十年於洪下置石閘一座 羊山新河 萬曆十一年議准由昭靈祠南黃河出口歷羊山內華山梁山接境山開河置閘以避咸港之溜

南旺湖

南旺湖即七十二泉所匯也跨寧陽濟寧之境縈迴百五十里漕渠貫其中湖既受漕河衝貫遂分為東西兩湖先年尚書宋理導汶東北流引入湖中而後分流南北則湖析而為三矣追其故惟以西岸為南旺西湖東岸二湖為南旺東湖二湖之下為馬踏坡與蜀山坡湖馬踏之下為五莊坡湖蜀山之下為馬場坡湖諸湖通

連中無限隔東西湖中爲長堤二西堤設斗門爲減水
閘十有八隨時啓閉以濟運河遇有淤淺隨時挑濬每
二年一大挑隆慶中開南旺月河二十里有奇以便大
挑北至王家窪南出尹家窪稍北里餘各建大閘一座

昭陽湖

昭陽簿運河沽頭等處亦大湖也於河之南口建二閘
啓閉從金溝口引水以濟沽頭諸閘嘉靖七年黃河決
東堤入昭陽湖壅沙沒其二閘自金口之流亦微是都
御史劉天和議將下流南口更築堤遏湖水使倒注鷄
鳴臺又將湖東新河陽絕之泉橫築壩以入湖由是水
積而利益大

按濟漕不出於此二湖也南畿志載淮揚諸湖之水渙
散無紀乃築堤束水界爲漕渠而田畝運道始利都御
史陳公濂又於邵伯湖作石堤二十餘里而堤始固湖
多風濤舟復損於石 弘治三年都御史白公昂又於
高郵之北五十里作外堤長四十里南北作石牌啓閉
名康濟河而湖患除惟汜光湖在寶應尚爲舟患知縣
聞人詮嘗請如高郵治外堤得可其奏而有司未竟其
事似不可終輟也 霍韜議云前議起河南山東丁夫
數萬疏濬淤塞以通運道然淤泥自高而下勢無限極
日役萬夫力亦不足今沛縣河淤運舟皆由昭陽湖入
鷄鳴臺至沙河宿遷路不過百里惟湖西寬闊夏秋水

溢波濤洶湧或有覆溺之虞冬春水涸復有膠淺之患若沿湖側畔築砌長堤濬為小河河口為閘以時蓄洩可備風濤水涸易為通濬目前運道可以無阻三月即上堤可成一年即石堤可成用力少取効速黃河愈溢運道愈利較之役夫丁以濬淤土愈濬愈淤勞逸大不侔矣

按昭陽湖跨沛之境南北與漕道貫脉顧當時始開漕者不藉於昭陽而別為一漕道者只以昭陽有覆溺膠淺二患耳今如湖側可築堤是或一說也

湖泉

湖泉之水導引蓄洩皆以濟漕為運道所關徐沛山東

諸河在運河東者儲泉以益河之不足曰水櫃在運河西者分漲以洩河之有餘曰斗門而淮揚諸河即為運道其山東新舊各泉可引以濟漕者派分為五入汶者為分水派入泗沂濟及天井開漕河者為天井派入白馬河及南陽棗林魯橋閘河者為魯橋派入南陽新河者為新河派即新河派入邳州河者為邳州派詳具於左

安山湖在東平州週圍八十三里零一百二十二步舊有二閘底高於河水不能入湖之下口無閘水不能出嘉靖六年止於湖中築堤十餘里而湖益狹後乃漸復馬場湖週圍四十里舊有堤復壞與運河相通河水稍

盈即洩入湖每致洩涸嘉靖十四年築堤長六十里內
外各植柳以護之更置減水閘五座運河易盈湖水亦
有蓄洩

蒲灣泊武家湖在汶上縣

南陽湖在魚臺即獨山坡滙為湖週圍七十六里引沙
河經其中入新河

昭陽大湖長十八里小湖長十二里二湖相連北屬滕
南屬沛週圍八十餘里納諸縣水湖口置石閘放水入
薛河由金溝口以達舊運河後以河決棄沽頭於湖東
開新河則南陽在東昭陽在西去黃水益遠運河乃安
赤山湖微山湖呂孟湖張莊湖四湖相連長八十里在

徐州引薛河出地浜溝入新河

蛤漫湖長二十里連汪湖長十五里周湖長二十里柳
湖長一十五里在邳州

落馬湖長六十里茅茨湖長六十里黃墩湖長二十里
侍丘湖長三十里倉基湖長三十里埠子湖長八十里
在宿遷縣

大莊湖長十里崔鎮湖長三十里在桃源縣

杜村湖長十里萬家湖長十里在清河縣

管家湖在淮安府城西門外舊有堤永樂十四年命
官於湖中築長堤以便運舟隨時修築

白馬湖長三里汎光湖即寶應湖長三十里界首湖即

津湖長三里在寶應縣新開湖長三十五里在高郵州邵伯湖長十八里在江都縣諸湖延袤高寶以抵揚州上下相接

泉

齊魯地多泉故開河自徐達衛地七百里賴泉以濟劉天和曰運道以徐交開河爲喉襟開河以諸泉爲本源今查泉源共一百七十六處散在泰安等州汶上等縣先年兗州府專設管泉同知一員近年以來每年雖有濬河之名全無實效將泉源濬而修治之庶漕渠有濟會通河始末

成祖永樂九年二月開會通河自濟寧至臨清舊通舟楫

洪武中衝決淤塞故於陸路置八遞運所每所用民丁三千車二百餘輓民因其役永樂初屢有言開河便者上重民力未許至是濟寧同知潘叔正言會通河道四百五十餘里其淤塞者三之一濬而通之不但山東之民免轉輸之勞實國家無窮之利乃命工部尚書宋禮都督周長侍郎金純發山東及徐州等處民丁開濬給以糧餉蠲其他役及今年田租仍命兩御史監督六月會通河成以汶泗爲源汶水出寧陽縣泗水出兗州至濟寧而合置天井閘以分其流南流達于淮而新開河則其西北流由新開河通東昌入臨清計三百八十五里自濟寧至臨清置十五閘以時啓閉舟行

便之 八月工部尚書宋禮等言會通河以汶泗爲源
夏秋霖潦泛溢則馬常泊之流亦入焉汶泗合流至濟
寧分爲二河一入徐州一入臨清河流深淺舟楫通塞
繫乎泊水之消長泊水夏秋有餘冬春不足非經理河
源及引別水以益之必有淺澁之患今汶河上流自寧
陽縣閘已築壩堰使其水盡入新河東平州之東境有
沙河一道本汶河支流至十里口通馬常泊比年泊沙
淤塞河口宜趁時開濬况沙河至十里口故道與東
必施工河口當濬者僅三里河中宜築堤計百餘段
從之 十三年開清江浦河道允漕運北京無阻
過壩渡淮以達清河挽運甚勞平江伯陳瑄以開河
西營家湖至淮河鴨陳口與清河口相直鑿河引湖水
入淮以通漕舟置四閘曰移風曰清江曰福興曰新莊
以時啓閉人甚便之

宣宗宣德四年平江伯陳瑄奏自徐州至濟寧河水多淺
轉運甚難今遣官巡視謝溝胡陵城八里灣南陽淺及
東昌梁家淺師家莊仲家淺皆常置閘其徂徠諸山泉
源所出舊有湖塘今多淤塞乞加修濬庶有停蓄通利
往來從之 七年置呂梁漕渠石閘初陳瑄以呂梁上
洪地險水急漕舟難行奏准令民於舊洪西岸鑿渠深
二尺闊五丈有奇夏秋有水可以行舟至是復欲深鑿
置石閘二時其啓閉以節水庶幾往來無虞事聞 命

附近軍衛及山東布政司量發民夫工匠協成之

英宗正統十三年秋河決滎陽東過開封城之西南經曹濮以入運河決張秋地至兗州府沙灣之東堤大洪口而決濟汶諸水皆從之又經蒙城縣至懷遠界入於淮海會通河遂淤治水之閘疏水之渠渠起張秋金堤之首東南行凡數百里經澶淵以接河沁名渠曰廣濟閘曰通源凡河流之旁出而不順者則堰之堰有九長袤皆至丈九堰既設其水遂不東衝沙灣乃更北出以濟漕渠之涸由是遂濬漕渠由沙灣而北至於臨清凡二百四十里南至於濟寧凡二百一十里復作淤水之閘於東昌之龍灣凡八役夫五萬八千有奇材九萬六千

有奇竹以竿計倍之鐵十三萬斤有奇鋌三千緡百八釜三千八百有奇麻百萬荆倍之藁桔又倍之石若土則不可以數計糧五萬石

憲宗成化四年巡撫江南都御史邢宥修復運河壩閘先是正統初巡撫周忱經理運道武進奔牛呂城設爲壩閘俾漕舟由京口出江最稱便利迨景泰間壩閘漸頽水道淤淺有議從蔡涇孟瀆出江者因迫海洋漕舟多覆溺天順己卯巡撫崔恭奏請從周忱故道增置五閘至是成之七年戶部尚書楊鼎工部侍郎喬毅上濬通惠河舊道事宜二十年大學士萬安等言我朝建都於北而上下供用多取給於江南然必藉船而後

可達於京師是運道水利所係甚重如河南懷慶地方築堤障沁水以濟徐呂二洪及邳州宿州桃源運道山東兗州等處導引汶泗沭河諸泉以濟濟寧上下運道今沁水衝決堤岸流入黃河汶泗沭諸泉歲久不濬亦各壅塞以致河流淺澁糧道稽遲請加修築疏濬上命工部侍郎杜謙董其事

孝宗弘治三年河決原武命戶部左侍郎白昂往治之時河決分三支一出封丘縣金龍口漫祥符長垣下曹濮潰張秋長堤一出中牟縣下尉氏縣一出汎蘭陽儀封考城歸德之境至於宿州廷議遣昂挑濬通許河江荊口二處弗績乃首築陽武長堤以防張秋築塞金

龍口挑濬滎澤縣之楊橋以分導河流濬宿州古汴河以達泗挑開歸德之小壩分河流入睢寧縣之小河名爲睢河以殺之又自小河西抵歸德飲馬池中經符離橋一帶皆深廣矣又疏月河十餘塞決口凡三十六由是河入汴汴入睢睢入泗泗入淮以達於海役夫凡二十五萬李東陽曰河之爲患自古有之漢以後衝決無常治法亦異有塞有浚有疏而疏之說勝國朝凡四決後爲張秋都憲徐公有貞治之有撓其議者曰不能塞河而顧開之耶使者至徐出二壺一竅五竅者各一注而瀉之則五竅者先涸使歸而議決此白公昂之親得於見聞者也金龍之決山東以爲憂而河南復虞

其塞議之弗定亦久矣白公既從其議於是倍增汴堤又疏其下流諸河故兩省之民咸宜之疏之效亦明矣哉五年決楊家金龍等口擢浙江左布政使劉大夏爲右副都御史往治之大夏曰不治上流則決口不可塞乃發丁夫數萬從黃陵岡浚舊賈魯河四十餘里由曹以出於徐分殺水勢又浚河自孫家渡口七十餘里別開新河一道由陳潁導水南行以入於淮又浚河由中牟扶溝陳潁二十五里至宿遷東入於淮又浚淤河由陳留縣至歸德州分二派一由宿遷縣小河口一由亳州渦河會於淮又築長堤起河南柘城經滑長垣東明曹單諸縣蓋徐州長三百六十里劉天和曰劉忠

宣弘治之役始惟治張秋久而弗績廼開上流孫家渡及導河下流由梁靖口出徐州繼治黃陵岡決而張秋之口自塞可以爲法矣又總督漕運都御史張偉云黃河沁水自大潭口合流東下先年此河於通許縣分流一股入鳳陽渦河接連淮河又於江荆口分一股流於衛輝河又於金龍口分一股流下張秋其徐州止是小黃河一股流下所以水不爲患近年以來通許縣河及江荆口二股俱已淤塞而金龍口又經先年侍郎白昂築塞况上流身寬闊水勢散漫及至徐州城邊河道窄狹所以涵湧衝決爲患

武宗正德四年黃河東決沛縣飛雲橋入運河勢甚盛

世宗嘉靖十二年冬十月河決亳泗歸宿等處自濟寧南至徐沛數百里運道遂淤 命右副都御史劉天和往治之初嘉靖戊子河流東潰飛雲治者疏開封趙皮寨口導之南由亳泗歸宿入淮以殺其勢至己丑庚寅兩年間飛雲橋之流益北徙魚臺之谷亭勢將及濟寧一時舟行閘面頗稱快顧決潰堤岸衝廣河身廢壞閘座阻隔泉源先見者懼有他虞及是年冬趙皮寨河南向亳泗歸宿之流驟盛東向南靖之流漸微梁靖岔河口東出谷亭之流遂絕濟寧南至徐沛數百里間悉淤 廷議天和往督濬事至訪群議或謂引黃河或謂濬漕河天和遂躬度自趙皮寨東流故道淤凡一百二十餘

里而至梁靖河底視南流高丈有五尺又自梁靖岔河口東流故道淤凡二百七十餘里而始至谷亭遂定計濬南旺淤淺以免盤剝築曹單長堤以防衝決施植柳法以護堤岸濬月河以備霖澇建減水閘以司蓄洩築縷水堤以防衝決置順水壩以來漫流運道遂通

按問水集謂河流之淤難復引之以入運如正統戊辰全河徙孫家渡即今榮澤縣南徙至弘治己酉凡四十餘年而始淤 朝廷相繼遣官往治自弘治六年迄嘉靖年間凡十餘濬每濬費數萬緡卒不能復故 國家治河如尚書平江伯陳瑄惟導汶濬淤建閘通運不復引河徐有貞白昂劉大夏諸公亦不過力塞之而已不

復資以濟運蓋河至則衝決去則淤填修治之工無時可已遷徙不常害多於利 宋歐陽脩曰黃河已棄之故道自古難復蓋河流既久底岸皆高水行漸壅自不能行乃棄而他徙非若人力填塞之河渠道猶存也

四十四年黃河泛徐州將溜溝以上運河淤凡一百六十餘丈以下淤七十餘丈又自境山至茶城五里許小閘至沛金溝口一十三里許俱淤其沛縣黃河亦徑衝魯村淺西岸循謝家莊至上閘上淺仍東北衝由三教灣一帶一十五里盡淤乃以朱衡為工部尚書往治河衡議開南陽口至溜城一帶新河以備運道又開溜城口至白洋淺一帶舊河以接新河費銀四萬有奇粟三

萬有奇功猶未就言官劾奏衡等乃濬自南陽口至仲家口俱底績可行舟但三河口至夏村口二十餘里微淺澁是年六月黃河水發遂決長堤二百餘丈其所挑舊河與沽頭閘數里復淤百中橋至溜城一帶新河堤又決百十餘丈及留城至白洋淺運道仍淤言官復劾奏 金景輝疏曰我 太宗皇帝建立京師首 命大臣疏會通河開清江浦增修各閘疏鑿二洪以通漕販開萬世太平之基近來河道淺阻轉輸稽遲天順七年 朝廷恐妨國計仍 命王竑總督漕運委臣河南疏黃沁二河分水灌注運河即今徐呂二洪下至清河一帶河道通行無阻矣惟安山北至臨清衛河至直沽俱

各水少而德州武城等處淺阻船隻不下千百餘艘不可不慮考得安山北至臨清二百五十餘里止有汶水春時雨少泉脉微細以至淺澁其汴梁城北陳橋原有黃河故道其河北由長垣縣大岡河經曹州至鉅野安輿墓巡檢司地界出會通河合汶水通臨清每秋水漲有船往來止是陳橋迤西三十餘里淺狹水小時月不得通流若開挑深闊亦可分引河沁二水以通運河如此則徐州臨清兩河均得河沁之濟而衛河亦增且開封長垣曹鄆等處稅糧俱免陸輓又江淮民船亦可由徐州小浮橋達陳橋至臨清得免濟寧一帶閘座擠塞留滯之弊甚為便利 王軌重開會通河疏云臣竊思

水陸轉運其勞逸省費較然甚明何欲置閘河於無用費腳價而不惜哉臣竊料閘運一年可省腳價銀十餘萬兩今當民窮財盡之時於 國計不為無補此特其利害之小者耳臣近聞空運邊糧備防邊關塞堡險隘遠近以防不虞因知密雲等處皆有間道可通若使姦細為之向道輕騎疾馳旋日可至或據倉廩或肆燒毀國儲一空則 京師坐困矣惟 陛下留神省察謀之二三元老乞 勅令巡倉御史會同工部管閘修倉主事兼理閘運閘板見存修補借之各廠少有疏濬并其他用度量支修倉餘剩巡倉贓罰并所省腳價民財民力亦不妄費大運京糧姑聽陸路自進且令覓船顧

人畧運百萬以試之如果可行就將省下銀兩蓋房造船築堤展河次第舉行所謂三七通糧漸撥京師自二八一九而全輸矣與國家無窮之利杜意外不測之虞所謂富國強兵一舉而兩得者也

今上萬曆二十三年三月南京禮科給事中朱維藩疏濬高寶二湖其畧云臣竊維高寶二湖界在淮泗之下既仰受上流之水又旁接諸山之水衆湖聯絡滙爲巨浸中間所恃者惟一線之堤耳堤之內涓滴皆漕渠也稍損之則病漕堤之外尺寸皆民膏也或溢之則病民二者皆非所以爲國也沿河者但知築堤爲要以堤日高而河身亦與之俱高矧堤土之版築一經風雨之淋則

卽此堤上之土又反爲填河之害矣如是則內之容受者不多暴水一至不得不漲堤口之決始以尋丈旣而數百丈其勢馬能禦哉去歲高郵清水潭決湖水東注數月不塞二州五縣之沃壤悉爲沮洳之場補葺未已又復報決且比閘漕渠之水亦漸艱澁可不爲寒心哉夫此二湖者雖善泛溢然皆通江達海可以宣洩仍有原設諸塘可以容納爲今之計慮其壅溢莫若導其下流之處何也水必有歸而後不爲害查得二湖之在上流者北可入江皆有故道可循在下流者則有蒙龍喻口尤爲入海要路聞有旨疏濬而復輟臣誠不知其故也尤有要者欲其容蓄必當預復其翕受之所何也

水必有容而後不橫溢查得該隸江都者則有上雷下雷小新之三塘隸儀真者則有陳公甸城之二塘緣茲二湖既受諸山之水必此五塘斯有容受之處原設石閘確有定例溢則由塘而南導之入江旱則引之入漕河以濟運此又先臣平江伯陳瑄規畫之至計今竟不聞修復何也乞 勅工部再議如復挑浚以疏積土復閘規以殺衝流皆有舊制似可無難惟濬下流并厚五塘二議尤爲喫緊耳 六月巡按高舉疏黃淮受病之原其畧云臣于去年奉 命巡按淮揚比五月入徐時徐州月河新成積水盡洩臣一望黃流見城外有堤幾與城齊堤外有河水與堤齊且水日益漲堤日益增將

不知其所終是黃水之日高爲徐城害者如此旣由徐而泗一望淮水見城墻以內積水占之城墻以外淮水環之傾頽民舍滄沒民田是淮水之日高爲泗城害者如此又由淮安歷揚州見揚州迤邐漕渠三百餘里所恃一線長堤乃其所以爲堤者皆岸上加土水高平地多者丈餘少亦不下五六尺夫堤高則漸薄薄則易潰今日報決青水潭明日報決濠家灣又明日報決邵伯口築土砌石歲無虛日聚料鳩工日無停晷閭閻日疲於奔命田舍悉漚爲巨浸是漕水之日高爲地方害者又如此臣嘗得之咨諏蓋黃河之水自星宿海歷關陝奔騰萬里而入于海淮河之水自桐栢涉壽穎夾七十

二溪之水由泗會黃而達于海夫此沆漭兩河納百川
需此一海口以沛其朝宗之脉則海口其咽喉也海口
沙壅咽喉作梗斯則河泥日結淤而高泥高于河水漲
于上向所稱呂梁一洪至爲險峻今則履爲坦途而不
知有洪于是乎黃漲而徐城坐困矣強黃外抗弱淮中
停况又截以高應堤以張福卽向所稱洪澤等河各有
界限今則漚而浩渺無涯淮漲而泗城告急矣淮不此
出勢必南注故每遇夏秋都管塘周家橋等處茫乎四
十餘里水漫而南于是乎水漲而漕堤決矣于此而按
其勢揆其源則鳳泗淮揚之陷溺病在淮淮停病在黃
黃之泛漲病在海口是故疏海口以導黃抑黃水以洩

淮此誠首務第恐茫茫海口工力難施則于今昔所議
三义鎮耿公廟訾家營鮑家口等處另開支河驅由漚
口而注之海以治其本黃水旣分淮無壅遏或又盡決
張福之堤大闢清河之口而縱之以治其標則 祖陵
以奠運道以安而鳳泗高寶之民可措之衽席矣 是
年冬十月工部覆議得分黃導淮大工事宜 一議錢
糧河工用銀六十八萬各役該領銀兩責成各道督率
各府佐官每十日一驗依期給領不許稽遲致悞工程
一議官夫該夫八萬餘名每夫給銀一兩五錢凡科
索苦累夙弊盡行禁革赴工之日照行伍之法每十有
長每百有率各設旗牌以便識認稽查分界止宿以杜

爭鬧設局施藥以療疾病調兵巡邏以防意外之虞
 一議分委以便責成河工重大工費不貲所賴以督率
 夫役稽查錢糧者惟大小官員也各府推官等兼督各
 州縣官分理周橋武墩涇河子嬰溝等處五港口三岔
 墩工程專屬之海口分司官并黃家壩三大工每工以
 部司及兵道各一人管理催募人夫及放錢糧措備器
 具照查夫役責之各部司與各道查催工程核驗土方
 給散工食柴米等項則屬之府佐官一應收放河工錢
 糧屬之淮安府掌印官查盤分黃錢糧屬之廬州府推
 官各官如遇陞遷不許離任 一議肅法紀以整肅人
 心大工肇舉怨謗易生所賴以整肅人心鼓舞衆志者

惟法紀嚴明也宜甄別勸懲有錢糧明白工程如式者
 定行紀勸否則紀罰總河以此甄別司道司道以此甄
 別各委官如橫生疑畏致隳大工者許指名具 奏重
 治 詔從之 二十四年三月工部奏 祖陵運道事
 本無重分黃導淮勢實相須向者淮流壅遏由于清口
 河身墊高黃流倒灌淤沙阻塞漸成門限以致水積野
 泗患及 祖陵今之議者有謂開黃家壩以分黃闢清
 口沙以縱淮而又開周橋武墩以消淮泗積水者有謂
 于運河口起至甘羅城北拐角對正東岸邊另挑小渠
 一道暫以行運者有謂沙在所當闢為目前第一務者
 即今糧運過淮在邇事勢燃眉雖運口新挑小渠暫可

通漕然非永賴長策則清口沙之闢誠有不容緩者至
謂運船出清口從鮑王口轉入黃河不如移口于江浦
上與鮑王口對直出入僅渡一河相距止二里許既無
遠涉輓輸之勞又免舊口淺灘之患為運道永便乞
命漕臣定議奏報如此不惟運道無梗塞之虞 陵泗
亦可免壅溢之患矣 詔可之至六月盡而功成 閏
八月工部覆奏高寶諸河為淮泗旁洩之路先因淮水
汎溢清口阻隘宣洩無自議開周橋等處急洩淮漲以
安 祖陵又恐淮身不容納故議濬涇河子嬰溝以洩
河入海闢金灣芒稻河以引湖入江即今分黃導淮已
告成功而猶當廣其入海入江之路以防伏秋之潰伏

乞下漕臣雜議

糧船

凡糧船有二曰遮洋曰淺船永樂初漕江南粟一由海
道至直沽口入白河抵通州一渡淮遡黃河至陽武又
陸運衛河抵通州海運用遮洋船裏河用淺船永樂九
年濬治會通河成運船由淮直達于衛遂罷陸運十三
年增造淺船三千餘隻一年四次從裏河轉漕遂罷海
運獨薊州軍餉用遮洋船海運如初凡修理改造南京
并中都留守司江南北直隸諸衛湖廣江西浙江三都
司淺船俱隸清江提舉司北直隸諸衛山東都司淺船
并遮洋船俱隸衛河提舉司內江南直隸湖廣等三都

續文獻通考卷之三百九 三十三 四百三十八
司淺船經由瓜州儀真壩者每五年一造其餘止由裏
河者并遮洋船俱十三年一造宣德五年以後江南直
隸湖廣等三都司淺船各歸原衛所自造嘉靖三年北
直隸山東都司淺船并遮洋船俱改清江提舉司造計
今原衛所并清江提舉司額造淺船一萬一千六百一
十八隻遮洋船五百二十五隻共一萬二千一百四十
三隻淺船以運京通倉糧三百七十萬石遮洋以運薊
州軍糧二十四萬石并天津倉糧六萬石凡運糧先年
俱官給運軍材料修理至成化十六年始令各處運糧
通加耗一斗各把總官變賣時價解送清江衛河提舉
司給與官軍造船其有司木料并抽分木植價銀停止

十七年議定清江衛河二提舉司造船料價銀共一
萬七千兩 弘治三年議准每船一隻官給銀五十兩
軍自辦五十兩底船准二十兩共銀一百二十兩 十
六年議准清江提舉司船增銀十兩通前共銀六十五
兩軍止辦二十五兩 嘉靖八年議准通行各該巡按
嚴督各該司府州縣衛所各將年例軍民料價預爲派
徵務在上年九月以裏給發若徵收未完聽將貯庫別
項官銀借給候完補還如十二月終不完給者府州縣
衛所收料官任俸正月終不完者府州縣衛所各掌印
官任俸收料官革去冠帶首領官吏提解漕運衙門問
罪四月終不完給者都布二司并府州縣衛所各掌印

并催科收料官一體叅奏提問府州縣衛所官降級文職送吏部別用軍職發回原衛帶俸差操中間若有侵那等項情弊從重究問二十年議准南京戶部將貯庫鹽引紙價積餘銀內每年動支一千七百八十四兩南兵部將武庫司收貯缺官柴薪銀內每年動支一千兩俱自嘉靖十九年爲始聽候總督漕運巡撫都御史委官支領前去淮安清江浦造船代南京疲敝衛所餘丁料價永爲定規

今上萬曆九年議准浙江漕船先因瓜洲車壩將雜木作底五年一更後因建閘得免車盤改限七年今改楠木計價一百二十七兩必駕運十年以外方許另造

續文獻通考卷之三十九終

續文獻通考卷之四十

皇明進士雲間王圻纂輯

國用考 海運

海運始末

秦始皇時攻匈奴自瑯琊轉輸至于邊

唐懿宗咸通中始議行海運

宋神宗熙寧七年京東路訪察鄧潤等言山東沿海州郡

地廣豐歲穀賤募人為海運山東之粟可轉之河朔以

助軍興詔京東河北路轉運使相度卒不果

元

世祖至元十九年始通海運初伯顏平宋遣朱清張瑄載

宋庫藏諸物從海道入京二人遂言海道可通乃命上海總管羅璧暨清等造平底海船六十艘運糧四萬六千餘石至京師然躬行海洋沿山求嶼風信失時明年始至直沽朝廷未知其利二十年用王積翁議廣開新河然新河候潮以入船多損壞民亦苦之於是罷新河事海運立萬戶府二以朱清爲中萬戶張瑄爲千戶忙兀解爲萬戶府達魯花赤二十四年始立行泉府司專掌海運增置萬戶府二總爲四府是年乃顏叛羅璧以漕舟至遼陽浮海抵錦州小凌河至廣寧十寨諸軍賴以濟乃加璧昭勇大將軍二十七年海船萬戶言山東宣慰使樂實所運江南米陸負至淮安易鬪者

七然後入海歲止三十萬石若由江陰入江至直沽倉民無陸負之苦且米石省運估八貫有奇乞罷膠萊海道運糧萬戶府而以漕事責臣當歲運三十萬石詔許之二十八年又用朱清張瑄之請併四府爲都漕運萬戶府二止令清瑄二人掌之其屬有千戶等官分爲各翼以督歲運清瑄故海盜也故備知海道曲折舟行無患而元亦信任之舉全臺付之兩人黃金虎符萬戶以下出入其手召募徧東南而莫之問以此獲其利成宗大德初初立海道運糧萬戶府於江浙受除者憚涉險不行張思明請陞等以優之因著爲令五年十月以畿內歲饑增明年海運糧爲百二十萬石七年以

灘放大洋至青水洋又經黑水洋至成山過劉家島至芝萊沙門二島放萊州大洋抵界河口其道差為徑直明年千戶殷明畧又開新道從劉家港入海至崇明州三沙放洋向東行入黑水大洋從成山轉西至劉家島又至登州沙門島於萊州大洋入界河當舟行風信有時自浙西至京師不過旬日而已視前二道為最便然風濤不測糧船漂溺者間亦有之亦有船毀而棄其米者至元二十三年始責償于運官人船俱溺者乃免然視河漕之費則其所得蓋多矣

仁宗皇慶元年增江浙海漕糧二十萬石 延祐五年以民饑增海漕四十萬石 七年以海漕不給命江浙行

省以財賦府鈔益之還其直

英宗至治三年減海道歲運糧二十萬石以江南民力困極而京倉充滿故也

泰定帝泰定二年海運江南糧一百七十萬石直至于京師 時廷議海漕事康里回以廩積方饒奏減糧數以舒東南民力可其奏


文宗天曆二年命江浙行省明年漕運糧二百八十萬石赴京師王克敬調海道都漕海運萬戶是歲當天曆之變海漕舟有後至直沽者不果輸復漕而南還行省欲坐罪督運者勒其還趨直沽克敬以為脫在常年而往返若是信可罪今蹈萬死完所漕而還豈得已哉乃請

令其計石數附次年所漕舟達京師省臣從之 至順
元年中書省臣言江浙民饑今歲海運為米二百萬石
其不足者來歲補運從之 九月江浙行省言今歲夏
秋霖雨大水沒民田甚多稅糧不滿舊額明年海運本
省止可二百餘萬 二年中書省臣言明年海運二百
四十萬石已令江浙運二百二十萬河南二十萬今請
江浙復增二十萬從之

初紹興之官糧入海運者十萬石城距海十八里歲令
有司拘民船以備短送吏胥得並緣以虐民及至海次
主運者又不即受有折缺之患時王良為海道漕運都
萬戶府經歷抗言曰運戶有官職之直何復為是紛紛
乃責運戶自載糧入運船又運船為風所敗者當覈實
除其數移文往返連數歲不絕良取吏牘披閱即除其
糧五萬二千八百石鈔一百五十萬緡運戶自是得免
於破家

順帝至元四年江浙海運糧數不足撥江西河南五十萬
石補之

初翰林學士虞集論曰東南運糧實竭民力今京師之
東瀕海數千里北極遼海南瀕青齊荏葦之場也而海
潮日至淤為沃壤宜用浙人之法築堤捍水為田聽富
民欲耕者合其眾分以地官定其畊以萬夫畊命為萬
夫長以千夫畊命為千夫長三年而征其稅如是則東



南民數萬可以衛京師可以防島夷可以省海運矣時
異議者多事竟寢

至正元年中書省奏海運不給宜令江浙行省於中政
院財賦府撥賜諸人寺觀田糧總運二百六十萬石從
之二十年貢師泰以戶部尚書分部閩中以閩鹽易
糧由海道轉運給京師凡爲糧數十萬石金陵之屬州
溧陽田賦八萬石入海漕者七萬四千石有奇歲轉輸
龍灣廣運倉由宜興無錫崑山嘉定四州之境出海入
江至于丹徒歷金山及黃天蕩沂流而上風濤湍激累
月然後能達其程二千五百餘里或遭覆溺寇攘之患
則爲費倍蓰至正三年行臺監察御史建議于臺以爲

漂陽與宜興接壤舟楫之利瞬息可至曷若聽民築倉
于宜興歲輸其租以給海漕則官富足而民力紓誠大
益也或者憚于更張遷玩累年至至正丁亥御史大夫
納麟蒞政南臺卒定其事民大欣慰

歲運之數

至正二十年四萬五千五十石至者四萬二千一百七
十二石二十一年二十九萬五百石至者二十七萬
五千六百一十石二十二年一十萬石至者九萬七
百七十一石二十三年五十七萬八千五百二十石
至者四十三萬三千九百五石二十四年三十萬石
至者二十九萬七千五百四十六石二十五年四十

續文獻通考 卷之四十一 四百三十三

萬石至者三十九萬七千六百五十五石 二十六年
九十三萬五千石至者九十一萬九千九百四十三石
二十七年一百五十九萬五千石至者一百五十一
萬三千八百五十六石 二十八年一百五十二萬七
千一百五十石至者一百二十八萬一千六百十五石
二十九年一百四十萬七千四百石至者一百三十
六萬一千五百一十三石 三十年九十萬八千石至
者八十八萬七千五百九十一石 三十一年五十一
萬四千五百三十三石至者五十萬三千五百三十四
石 元貞元年三十四萬五百石 二年三十四萬五
百石至者三十三萬七千二十六石 大德元年六十

五萬八千三百石至者六十四萬八千一百三十六石
二年七十四萬二千七百五十一石至者七十萬五
千九百五十四石 三年七十九萬四千五百石 四
年七十九萬五千五百石至者七十八萬八千九百一
十八石 五年七十九萬六千五百二十八石至者七
十六萬九千六百五十石 六年一百三十八萬三千
八百八十三石至者一百三十二萬九千一百四十八
石 七年一百六十五萬九千四百九十一石至者一
百六十二萬八千五百八石 八年一百六十七萬二
千九百九石至者一百六十六萬三千三百一十三石
九年一百八十四萬三千三石至者一百七十九萬

續文獻通考 卷之四十一 七 王成

五千三百四十七石 十年一百八十萬八千一百九十九石至者一百七十九萬七千七十八石 十一年一百六十六萬五千四百二十二石至者一百六十四萬四千六百七十九石 至大元年一百二十四萬一百四十八石至者一百二十萬二千五百三石 二年二百四十六萬四千二百四石至者二百二十八萬六千三百石 三年二百九十二萬六千五百三十三石至者二百七十一萬六千九百十三石 四年二百八十七萬三千二百一十二石至者二百七十七萬三千二百六十六石 皇慶元年二百八萬三千五百五石至者二百六萬七千六百七十二石 二年二百三十

一萬七千二百二十八石至者二百一十五萬八千六百八十五石 延祐元年二百四十萬三千二百六十四石至者二百三十五萬六千六百六石 二年二百四十三萬五千六百八十五石至者二百四十二萬二千五百五石 三年二百四十五萬八千五百一十四石至者二百四十三萬七千七百四十一石 四年二百三十七萬五千三百四十五石至者二百三十六萬八千一百一十九石 五年二百五十五萬三千七百一十四石至者二百五十四萬三千六百一十一石 六年三百二萬一千五百八十五石至者二百九十八萬六千一十七石 七年三百二十六萬四千六石至



者三百二十四萬七千九百二十八石 至治元年三百二十六萬九千四百五十一石至者三百二十三萬八千七百六十五石 二年三百二十五萬一千一百四十石至者三百二十四萬六千四百八十三石 三年二百八十一萬一千七百八十六石至者二百七十九萬八千六百一十三石 泰定元年二百八萬七千二百三十一石至者二百七萬七千二百七十八石 三年三百三十七萬五千七百八十四石至者三百三十五萬一千三百六十二石 四年三百一十五萬二千八百二十石至者三百一十三萬七千五百三十二石 天曆元年三百二十五萬五千二百二十石至者三百二十一萬五千四百二十四石 二年三百五十二萬二千一百六十三石至者三百三十四萬三百六十六石

按元自世祖用伯顏之言歲漕東南粟由海道以給京師始自至元二十年至于天曆至順由四萬石以上增而為三百萬以上其所以為國計者大矣歷歲既久弊日以生水旱相仍公私俱困疲三省之民力充歲運之恒數而押運監臨之官與夫司出納之吏恣為貪黷腳價不以時給收支不得其平船戶貧乏耗損益甚無以風濤不測盜賊出沒剽劫覆亾之患自改至元之後有不可勝言者矣由是歲運之數漸不如舊至正元年益

以河南之粟通計江南三省所運止得二百八十萬石三年又令江淞行省及中政院財賦總管府撥賜諸人寺觀之糧盡數起運僅得二百六十萬石而已及汝穎倡亂湖廣江右相繼陷沒而方國珍張士誠據淞西之地雖縻以好爵資爲藩屏而貢賦不供剝民以自奉於是海運之舟不至京師者積年矣至十九年朝廷遣兵部尚書伯顏帖木兒戶部尚書齊履亨徵海運于江淞由海道至慶元抵杭州時達識帖睦兒爲江淞行中書省丞相張士誠爲太尉方國珍爲平章政事誥命士誠輸粟國珍具舟達識帖睦兒總督之旣違朝廷之命而方張互相猜疑士誠慮方氏載其粟而不以輸于京也

國珍恐張氏掣其舟而因乘虛以襲已也伯顏帖木兒白于丞相正辭以責之巽言以諭之乃釋二家之疑克濟其事粟之載于舟者爲石十有一萬二十年五月赴京是年秋又遣戶部尚書王宗禮等至江浙二十一年五月運糧赴京如上年之數二十二年五月運糧赴京視上年之數僅加二萬而已二十三年五月仍運糧十有三萬石赴京九月又遣戶部侍郎博羅帖木兒監丞賽因不花往徵海運士誠托辭以拒命由是東南之粟給京師者遂止於是歲云

元之海漕其利甚溥其法亦甚備船有仙鶴哨船每船三十隻爲一綱大都船九百餘隻漕米三百餘萬石船

戶八千餘戶又分其綱爲三十每綱設押綱官二人以常選正八品爲之其行船者又顧募水手移置揚州先加教習領其事者則設專官秩三品而任之又專責清瑄輩但加秩耳不易其人此所以享其利幾百年當全盛之時固無庸論至正之末天下分崩猶藉張士誠給數年豈非以措置得宜久而不變哉

皇明

初海運猶仍元舊自會通河成報罷嘉靖中分巡王獻濬膠萊故道燒鑿馬家濠十五里達于麻灣工未竟而止隆慶五年議因其故門新河令江南之糧由淮安清江浦口歷新壩口馬家濠麻灣口至海倉口徑抵直沽天津止一千六百里半從河行其海行者止由海套不泛海洋惟馬家濠分水嶺二處開鑿爲難遣科官勘報以無源水多沙積而止萬曆初亦有建議行之者以費不貲報罷

巡按山東御史商爲正議欲從元人故河引濶泉瀦水通漕道但南海由海口至店口三十餘里多沙自麻灣以上係沽河流沙與土沙互壅麻灣以下則金海中隨潮湧進淖沙勢俱難處欲由把浪廟北古路溝另開二渠至鴨綠港纔避麻灣十三里之沙由鴨綠港迤南尚有沙洲見露水中卽空舟尚不能行况古路溝未挑通地脉相似安知下無沙安保他日海沙不湧入北海海倉

口龍王廟前沙數十里許用徒夫及昌邑夫三千餘人撈二十餘日給過工食二千二百兩去沙僅二尺路止二里沙堆積岸上大潮一至沙壅如故且復議築堤約水障沙不知海口之堤用土則勢不能當用石則費不可計分水嶺自嘉靖十七年至隆慶五年節次勘測皆高海面五丈以上上接白河流沙先年胡給事中謂流來之沙旋挑旋壅况沙中乃有石沙見水則可搏濕泥帶水即成稀滋軟土故役人言地底有泉泉內有沙工力難施夫海口之沙既欲避而不可得兩海之潮又勢遠而不能通縱欲引附近張魯河白河膠河都泊諸水以益之而春夏旱乾俱各微細既不足恃秋澇沙壅輒

復爲患徒費挑濬奏聞報罷

嘉靖中河道都御史于湛云海運由浙西不旬月可達都下較之河運費省而功倍丘文莊言之詳矣近年言者多厭河運之勞欲舉文莊之策乃猶有以海運爲不便者謂文莊計漂溺之米而不計漂溺之人故以海運爲便不知米漂而載米之舟駕舟之卒管卒之官能獨免乎考元史至元二十八年海運漂米二十四萬五千六百有奇至大二年漂米二十萬九千六百有奇即如文莊言每舟載米千石用卒二十人則歲溺而死者殆五六千人此殘虜之所以忍於華人也柰何華人亦忍於華人哉河運之費於人所謂人亾人得損上益下王

者以天下爲家又奚恤也且今之黃河經行河南之祥符去衛河僅七十里鑿而通之萬夫一月之力也議者徒以衝決爲難竊以爲黃河之難不難於海也夫今之黃河固古之運道也古固北而今始南遷也在古則宜在今則否在南則利在北則否在民則可在公則否在海則易在河則難吾不知其何說也


嘉靖三十一年給事中賀涇上疏云海運之說不講久矣一旦而議之未有不駭且疑者然使如先臣丘濬所謂泛登州由沙門島蹈風濤不測之險以犯倭寇出沒之區是非不可講而亦不忍講也若新河旣開有通運之利而無冒險之害則亦何所憚而不爲哉訪之膠州

近淮人呼爲南海萊州近天津衛北人呼爲北海自南海而至淮僅五百里商舶往來百貨貿易迅風三日可達今膠已成巨鎮矣此則由海之岸而非大洋也自北海而達天津僅六百餘里泉貨所必經商賈所共由順風五日可達今亦已成坦途矣此則由海之夾渠而實非海也然前此不通運道何哉蓋自膠州之南海以達滄州之北海中間不通者百七十里之間見有新河一道可以行舟而未之通者由馬家濠十五里爲梗耳濠底土石頗堅難於濬闢若併力疏濬此河則南北轉運之通特易耳嘉靖十四年山東海道副使王獻銳意訪求曾經督率工力專鑿馬家濠功已半成以遷代去

繼之者不能就其功海濱之民至今稱惜乞遣官親詣膠州海口由馬家濠抵新河訪求故蹟加工開鑿則一勞永逸寔貽萬世無疆之美不報

平度州崔旦伯海運議曰自南直隸淮安府淮河入支家河至漣子口河計三百八十里入於海由海至山東安東衛至膠州麻灣海口二百八十里風帆一晝夜自淮抵膠矣由麻灣膠萊河至海倉大海口三百五十里入海大海口至唐頭一百二十里唐頭至小聖廟洋二百里小聖廟洋至北直隸小直沽河八十里又一百五十里抵天津衛丁字沽風帆二日夜海倉亦抵天津矣通計一千四百餘里而海洋之中不過六百里耳回視

登萊故道風濤萬里洋礁蜴集勢之險易懸絕所可慮者膠萊河之淤塞阻滯不通耳嘉靖十一年御史方遠宜巡歷登萊訪茲遺跡為圖表之而新河之名肇矣嘉靖十七年副使王獻慨然身任飭材鳩工建閘石基址而新河之事興矣自此之後商賈雲集膠州平度鄰境十數郡邑之民仰給攸賴上年聞倭寇之變海防禁之且議者有欲引濰水於上流又艱於地勢之下有以分水嶺之高險而難於取鑿有以馬家濠苦頑石之嶙峋有以麻灣海倉口慮潮沙之流動有畏秋溢之淤塞有主丈尺之高下有論工役之重大紛紛不決愚以為東塞沽河西塞濰河可以復海運避萬里風濤之險馬家



濠石峽五里王獻開鑿將成偶爲當道所阻事不底績
或欲兩頭置閘以蓄潮水通舟避險亦有可講者但曠
日持久徒費工役近來客船多由薛家島迤東淮子口
大洋轉尖入麻灣口自把浪廟入龍家屯石喇灣雖小
石里餘亦易爲工五里至陳村閘舊時有壩遏沽河水
不得東行而海潮止此不北矣大沽河淤壩漢唐以來
古蹟尚存捲掃打壩橫遏沽水南下若大雨時行沽水
泛溢則開閘以防其橫流春夏之交河水淺溢則閉閘
以達其清派由小閘口入桃河十五里入吳家口以厚
分水嶺以南水勢分水嶺乃白沙年久積沙所滲而淘
取甚易置閘障之以隔淤沙由河身堅固如鐵非頽岸

崩崖之比也窩舖有都泊環水百里築置長堤作減水
閘以約水北下引膠河水入張魯河河通高密縣五龍
河連絡諸城諸水以厚分水嶺以北水勢周家莊閘引
大壩河與小壩河相通入九穴泊鑿渠五丈引水以入
昌許渠濰河水勢極大打壩遏水東行自媒河以達膠
河蓄洩洩泉皆如沽河事例以厚玉皇廟迤東水勢王
皇廟淺窄孫鎮口淤土稍費工力楊家園新河海倉大
海口潮水時至乘潮可舉潮至呂橋亦不南矣河身比
之泊身頗高每遇旱乾則河水消耗每遇霖澇則野水
混合若將河身濬五六尺衆水就下取河身土以爲堤
外取土重覆之以成月河減水開水有閘以時蓄洩則

水有歸向而淤塞之患免矣夫三百餘里之內今宜開淤挑淺不過百五十里耳以錢計不過七八百萬錢以人計不過二百萬工以時計不過二年權度其疏塞之孰急乘除其利害之孰甚毅然必行實社稷無疆之慶也

何孟春曰國家就北建都郊廟 朝廷 禁籞邊徼凡百司庶府吏士賓客工役祭祀祿給享燕供饋錫賚施卹之費歲億萬計卒仰東南東南賦稅率由河漕 京師河漕之制分兵民之賦半天下府衛力以爲轉輸官軍十三萬七千八百有奇舟一萬二千一百有奇輸糧石帶耗六百萬有奇昔黃忠宣福嘗請於濟寧以北備

輝真定以南近河地役軍民十萬人屯田積谷省漕粟下行在戶兵部議時郭資張本言沿河屯田便鳳陽淮安以北及山東河南北直隸近地二百里內通舟楫處擇荒閒地以五萬頃爲率發附近軍民五萬人耕給官牛農器未幾有言軍民各有常業若復分田役益勞攘事竟不行竊謂養兵之費未受其弱而寓兵於農古聖王良法也沿河屯田之便誠有如所議者惜當時未有能毅然行之耳

穆宗隆慶元年十二月戶科魏時亮言遼陽自罷海道運轉餉甚艱乞稍通舊路于每歲季或大熟極荒之秋間一行之仍厲禁譏察非常則山東米粟貿易旣爲兩利萬

一全河戒嚴而襟喉之地可無阻矣從之 二年正月
順天撫臣劉應節等以永平西門直抵海口至天津凡
五百餘里可通漕議令永平通判及指揮等官募諸縣
民習知海道者與俱赴天津領運仍同原運官軍駕海
舟出大洋至紀谷莊更小舟運至永平倉其造船水夫
諸顧募轉搬之費取諸漕運糧輕齎及食粟之餘者戶
部覆言故事獨薊遼有遮洋總而無永平海運今驅漕
卒冒不測之險于計不便即如撫臣等言謂以山東河
南額派薊鎮漕運分撥折色十萬石俱改本色運至天
津交兌永平通判指揮等官徑自領運不必同原運官
軍其沿途轉搬入倉工費皆如漕規扣給以原撥永平

民運及太倉所發年例如數抵運薊州 上從部議

初嘉靖間山東按察司副使王獻建議請循元人海運
遺跡於膠萊間開河渠一道舟由淮安靖江江浦歷新
開口馬家濠麻灣口海倉口以達天津道里甚近徑度
不過千六百里又可避海洋之險業已從其議開鑿將
畢會獻去官遂罷其役至是戶科給事中李貴和言比
歲河決轉餉艱難請修獻遺策開膠萊新河復海運以
濟餉道 上以爲事體重大遣給事中胡欝往視之欝
及山東撫按官議皆以爲不便疏治乃奏言今爲新河
之議者徒指元人故渠及副使王獻臆說非能涉三百
餘里間親睹其利害也臣嘗濬分水嶺驗問獻所鑿渠

皆流沙善筋雖有白河一道徒涓涓細流不足灌注至
如現河小膠河張魯河九穴都泊稍有潢汙亦不深廣
膠河雖有微源然地勢東下不能北引且陳村閘以下
夏秋雨驟衝流積沙爲河大害縱謂諸水可引亦安能
以數寸之流濟河之用則諸河之不足用明矣或謂諸
河頗多積水可因用爲渠不知潢潦所聚皆以下流壅
滯之故設皆濬深水必盡洩則蓄水之不足恃明矣或
欲引濰河之水不知濰河之高密西去新河一百二十
餘里中間高嶺甚多雖竭財力終不接濟則濰河之不
可引明矣分水嶺以南至陳家閘以北至周家莊雖云
近海通潮又皆岡石糜沙終難鑿治則海水之不可達

明矣大抵上源則水泉枯涸無可仰給下流則浮沙易
潰不能持久二者皆治河之大患也故元史食貨志以
爲勞費而無成 國朝徧訪運道舍此而不顧自獻以
後屢勦不行良由于此苟率意輕動捐內帑百萬之費
以起三百里無用之渠如誤國病民何請亟罷其事并
令所司明示新河必不可成之端勿使今之旣誤而復
誤後人也 上乃罷之令自今不必更議以滋紛擾
五年山東撫臣梁夢龍等上海運議曰今漕河多故言
者多獻開膠河之說此非臣等所敢任也第嘗考海道
南自淮安至膠州北自天津至海倉各有商販往來舟
楫屢通中間自膠州至海倉一帶亦有島人商賈出入

其間臣等因遣指揮王惟精等自淮安運米二千石自膠州運米一千五百石各令入海出天津以試海道無不利者其淮安至天津一道計三千三百里風便兩旬可達况舟皆由近洋洋中島嶼聯絡遇風可依非如橫海而渡風波難測大約每歲自五月以前風順而柔過此稍勁誠以風柔之時出並海之道汛期不爽占候不失即千艘萬櫓可保無患以接濟京儲羽翼漕河省牽挽之力免守幫之苦而海防衛所犬牙錯落又可以嚴海禁壯神都甚便事下戶部戶部以爲海運法廢已久難以盡復乞勅漕司量撥近地漕糧十二萬石自淮入海工部即發與節省銀萬五千兩充備召水手之

費上從之六年三月總督漕運王宗沐條上海運七事一定運米言海運既行宜定撥糧額以便徵兌隆慶六年已有缺船糧米足備支運以後請將淮安揚州二府兌改正糧二十萬一千一百五十石盡派海運行令各州縣於附近水次取便交兌遇有災傷改折則撥鳳陽糧米足之一議船料言海運二十餘萬通計運船四百三十六艘淮上木貴不能卒辦宜酌派湖廣儀真各廠置造其合用料價十一萬八千四百兩有奇即將清江浙江下江三廠河船料價併浙江湖廣本年折糧減存及湖南班匠等銀解用不足以撫按及巡鹽衙門罰贖銀抵補一議官軍言起運糧船宜分派淮

大台溫十四衛責令撥軍領駕每艘照遮洋舊例用軍
十二人以九人赴運其三人扣解糧銀添僱水手設運
海把總一員統之其領幫官員於沿海衛所選補所須
什物即將河船免運軍丁糧銀扣解置辦一議防範
言糧船出入海口宜責令巡海司道等官定派土島小
船置備兵仗以防盜賊一議起剝言糧至天津海口
水淺舟膠須用剝船轉運至壩每糧百石給水脚銀二
兩九錢其輕齎銀兩先期委官由陸路起解聽各督糧
官收候應用一議回貨言海運冒險比之河運不同
旗軍完糧回南每船許帶私貨人十擔給票免稅以示
優恤一崇祀典言山川河瀆祀典具載今海運所畏

者蛟與風耳宜舉廟祀以妥神明疏下部覆如宗沐言
詔允行之四年九月河決小河口宿遷至徐州三
百里皆淤而坡顧爲河時漕政大弛漕艘五月入淮八
月入閘十月守凍河水橫決漕舟逆流漂損至八百艘
溺死漕卒千餘人失米二十二萬六千六百餘石河道
都御史萬恭疏言黃河自西而東淮自南而北會于清
河口東南入海夏秋海潮旣盛河復騰湧河不得入海
逆流入淮淮不敵河故水倒流而泥沙一擁遂致澱淤
旣淤則必衝踈土而決之矣今惟疏其下流捍其決口
水將自順毋煩多謀以滋勞費時科臣李貴和議開膠
河恭令山東郡邑試之浮沙百里旋開旋塞其頑石粗

礦不可鑿者五十里有奇徒費無成議遂寢 時漕舟
敝者幾二千而漂沒又八百艘蓋幾無漕云于是科臣
宋良佐議行海運而山東左布政王宗沐素好奇計力
主海運之策乃遷總督漕運副都御史提督軍務巡撫
鳳陽等處宗沐疏畧云唐人都秦右據岷涼左通夾渭
是有險可依而無水通利也有險則天寶興元恃其強
無水則會昌大中受其貧宋人都梁背負大梁南接淮
汴是有水通利而無險可依也有水則景德元祐享其
全無險則政和宣和受其敝我 朝都燕北有居庸巫
閭以爲城南通大海以爲漕猶憑左臂從左脇下取物
也元人用之百餘年乃棄之而專藉一線之河非計矣

從之遂以二十萬石自三月十八日自淮出海至五月
二十九日抵天津後行之數年遇龍躍覆溺數萬言者
交擊之乃罷

支大綸曰萬恭王宗沐皆卓然名世之賢也中世狃近
利而暗遠猷標門戶而忘 國計立論者逞攻擊之私
主畫者多退避之巧而高賢不究其用矣語漂溺則河
安而海危語牽輓則海省而河費若一夫作難而瓜儀
決堤徐淮潰河臨濟敗聞則舍海漕奚賴焉但太倉起
帆元跡可倣而乃云淮安出海以避險不虞瓜儀之梗
乎閩南商賈泛大洋經東海如馳道奚獨于漕運而難
之

陸欽曰漕利通而海運罷膠萊故道亦遂堙廢夫河漕誠利矣然泉源壅塞有疏濬之勞堰閘蓄洩有供役之煩徐呂洪流之泛溢淮揚襟喉之扼塞意外之患有不可不防者海運豈可不講耶是故漕河者萬世之通利也海運者備不虞之變也膠萊故道者翼河運以成功也皆不可廢也天下之事居常者必慮變擇利者必思害輕重緩急達其勢而已矣獨漕政爲然哉

周弘祖曰淮河北岸隔一里爲支家河通新溝至安東縣有澳河嚮水三义俱臨淮可通東則有東漣河朱家河白家河七里河流入淮又東有塩場河平望河界官河牛洞河車軸河流入海俱宜築塞中有暹蠻河在淮

海之交可置閘以殺水勢西則有沐陽水溷爲太湖爲傅湖又有楊家溝西漣河崔家溝古閘河皆入漣河海口自支家河至漣河水程三百八十里入于海由海州贛榆至山東界歷安東衛石臼所夏河靈山衛膠州瞭頭營至麻灣海口計二百八十里隔馬家灣五里可通把浪廟新河口店口社陳莊小閘戴高劉家大閘王朱社家小村至平度州又經窩舖停口大成昌渠小閘新河集秦家莊海倉口至大海口共三百七十五里大海口至直沽四百里通計一千四百三十五里輿地圖云登萊本海運故道稽之往蹟平度州東南有南北新河水源出密縣至膠州分爲二流北河西流入萊之海倉

口入海以其自膠抵萊故云膠萊蓋元時所濬可避迤
東海道數千里之險嘉靖十一年御史方遠宜巡東萊
訪其遺跡爲圖表之副使王獻力主其說近羅文恭亦
取王議備載廣輿圖云海運憚文登南之成山登州北
之沙門此兩險多積又成山突出當東洋之衝沙門旋
扼處北洋之腹宜無靖勢新河一開可避兩險不爾則
古濰水及沽尤河稍致力皆可免於兩險通惠河元郭
守敬議開引昌平白浮村神山泉過雙塔榆河引一畝
玉泉諸水進都城繞至通州置閘以宣節之後漸淤廢
嘉靖間御史吳仲議修築立五閘閘置剝船六十每米
一石減陸輓費銀四分五厘歲省漕價十萬餘兩

徐恪上漕河圖志叙曰余觀漕河圖未嘗不敬歎我

祖宗聖謨神烈之宏遠也夫漢唐皆嘗王關中矣宋嘗
都汴矣而漕挽有三門七津之險有海運之難其故道
猶存見者罔弗騰駭惟我 國家則不然跨江入淮由
河達濟四瀆畢涉舳艫相望者三千里雖有呂梁徐州
二洪之險又皆疏鑿之 命水部臣監臨之舟航利涉
惟汝濟泉源或遇陽亢泉出微細則疏沂泗諸水以益
助之築閘置吏以啓閉之分 命水部臣以轄之總
命大臣以督之又淺深惟均漕舟往來勿滯官軍樂於
用命吳艤越艤燕商楚賈珍奇重貨歲出而時至言笑
自若視爲坦途於乎其視漢唐宋之險且難者奚翅霄

續文獻通考 卷之四十一
三十三
壤哉

本朝海道附考

一自南京開洋出龍江關靠東邊行使到觀音山中洪
一路好行至礮山北有淺灘中洪可行望方山東邊中
洪一路淺灘直過斬龍廟止至鮭魚廠東路至龍潭驛
一路水緊北邊中洪可過徑到儀真中洪北到金山寺
西首十餘里水緊不可拋猫寺北中洪都好行到礁山
門仔細戳水行西南嘴有淺灘喚做姜婆沙西北下戳
水中洪好行南有淺灘中洪到孟子河西南好行東北
中間淺灘沙嘴占多是洪有蘆青嘴東南衝出有三四
里轉過南中洪戳水行使便是黃山東北淺灘衝出大

江中洪行使望西邊駁水洪過東有馬馱沙西南嘴衝
出沙帶一條東南亦有沙帶一路中洪可行南有江陰
縣地方拋船江陰縣西邊是夏港過江陰縣中洪到巫
子門淺塞打外洪過喚做寶船洪望見西北蝦蟆山可
轉中洪到蝦蟆山西淺水好行南有谷瀆港中洪有淺
水南有洪照黃恩舖占南岸行使到夷舖港南有淺灘
北邊是洪到福山港中洪到白茆港北有狼山望東北
戳水中有淺北有洪徑到瞭角嘴南路於劉家港拋泊
一劉家港開船出揚子江靠南岸徑使候潮長沿西岸
行使好風半日到白茆港在江待之潮平帶篷櫓搖過
撐脚沙尖轉過崇明沙嘴挑不了水望正東行使無礙

南有朱八沙婆婆沙三脚沙可須避之楊子江內北有
雙塔開南有范家港沙灘東南有張家沙灘江口有陸
家沙脚可避口外有暗沙一帶連至崇明洲沙亦可避
之江北有瞭角嘴開洋或正西西南西北風待潮落往
正東或帶北一字行使戮水約半日可過長灘便是白
水洋望東北行使便見官綠水一日便見黑綠水循黑綠
水望正北行使好風兩日一夜到黑水洋好風一日一
夜或兩日兩夜便見北洋綠水好風一日一夜依針正
北望便是顯神山好風半日便見戎山自轉瞭角嘴東
過長灘依針正北行使早靠桃花斑水邊北有長灘沙
嚮沙半洋沙陰沙冥沙切不可避之如在黑水洋內正北

帶東一字行使料量風沉日期不見成山見黑水多必
是低丁可見升羅嶼海中島西邊有不等磯如筆架山
樣即便復回望北帶西一字行使好風一日一夜便見
成山若過黑洋見北洋官綠水色或隴必見延真島望
西北見箇山尖便是九峯山向北一帶連去有赤山牢
山二處皆有島嶼可以拋泊若牢山北望有北茶山白
蓬頭石礁一路橫開百餘里激波如雪即便開使或復
回望東北行使北有馬安山竹山島南可入拋泊北是
旱門亦有漫灘也可拋泊但東南風大不可拋擊北向
便是成山如在北洋官綠水內好風一日一夜正北望
見山便是顯神山若挑西一字多必是高了但見赤山

九峯山西南洋有北茶山白峯頭即便復回望東北行
使好風半日便見成山一轉過成山望西北行使前有
鷄鳴嶼內有浮礁一片可以避之往西有夫人嶼不可
在內使船收到劉島西小門也可進廟前拋泊劉島開
洋正西行使好風一日到芝罘島東北有門可入西北
離有一百餘里有黑礁一片三四畝大避之收到八角
島東南有門可入自芝罘島有好風半日使過抹直口
有金嘴石衝出洋內潮落可見避之至新河海口到沙
門島東南有淺可挨深行使南門可入東邊有門有暗
礁二塊日間可行西北有門可入廟前拋泊沙門島開
洋望北經過砣磯山欽島沒島南半洋北半洋到鐵洋

往東收旅順口黃洋川西南有礁黃洋川東收平島口
外有五箇饅頭山進口內拋泊南邊一路老岸外有一
孤剏成兒嶺盡頭東望有三山正中進入內有南北沙
帶一條相連陡岸深水可以拋泊三山西有南山收進
青泥窪西有松樹島北有孤山東北望看鳳凰山便是
和尚島烽墩下占西有礁石西北有倉廟外有淺灘亂
礁避之三山北看青島一路山望海駝收黃島使島鐵
山往西收羊頭窪雙島有半邊山艾子口看塔山看連
雲島東北看蓋舟一路山看鹽場西看寶塔臺便是梁
房口進入三义河收牛壯馬頭拋泊直沽開洋望東拋
南一字行使一日一夜見半邊山便見沙門島若挑南

字多了必見萊州三山便挑東北行使半日便見沙門
島若挑北字多必見砣磯山往南收登州衛北沙門島
開船東南山嘴有淺可挨中望東行使好風一日一夜
到劉島收入官前劉島開洋望東挑北一字轉成山嘴
望正南行使好風一日一夜見綠水好風一日一夜見
黑水好風一日一夜便見南洋綠水好風兩日一夜見
白水望南挑西一字行使好風一日點竿累戳二丈漸
漸減作一丈五尺水下有亂泥沙約一二尺深便是長
灘漸漸挑西收洪如水竿戳着硬沙不是長沙地面即
便復回望大東行使見綠水望東行使到白水尋長沙
收三沙洪如收不着洪即望東南行使日間看水黃綠

水浪花如茶末木夜間看浪潑如大星多即是茶山若
船稍坐茶山往西南一字好風半潮北見崇明沙南見
青浦墩沿岸劉家港如在黑水洋正南挑西多必是高
了前有陰沙半洋沙嚮沙攔頭沙即是瞭角嘴北便復
回往正東行使看水色風汛收三沙洪如風不便收不
得洪即挑東南行使看水色收寶山如在黑水大洋挑
東多必是低了可見隔界大山一座使望正西挑南一
字行使好風一日一夜便見茶山如不見隔界山又不
見茶山見黑綠水多便望正西行使必見石龍山孤礁
山復回望西南行使見茶山收洪後任盡回帆程限一
遼河口開洋順風一日一夜經至鐵山南面山前帶東

鐵二字望南行使經至成山收入南洋望正南行使三口三夜經至桃花斑水邊望東行使見白水帶西二字勤戳點竿尋投長灘一丈八尺漸漸減至一丈五尺望西行戳楊子江洪如尋不見洪內望下使必見茶山至茶山後水溺船稍南面坐茶山望西行使半湖便見崇明洲如若風順一朝送至劉家港口內拋泊若船去回須記桃花斑水比有半洋沙嚮沙陰沙在洋內須要隄防凡空回還不可料程早早可使船小料亦如此即防無礙一福建布政司水波門長樂港船廠門船水程地頭預要水手船隻護送沿港海島其神仙壁碧水屋山島去處古有賊船以一長便船開洋送至三岔河口如

過一日二日至古山寺登山送香燭防東南颶作潮大過日平息送至望琪港娘娘廟前拋泊過日至長樂港口過一日至民遠鎮巡檢司過一日至總埠頭港過一日至福州左等衛告要水手船送過一日至五虎廟總福過一日至五虎門開洋望東北行使正東便是裏衣山正北便是定海千戶所東南便是福清縣鹽場過一日至王家峪海島拋泊過一日至北高山巡檢司西洋山口好拋泊過一日至福寧縣晚收風火幫娘娘廟前拋泊過了一日至滿門千戶所防有天霧晚收艤艚巡檢司海口過一日至金鄉衛告要水手船隻引送過一日至松門衛過一日至温州平陽縣平陽巡檢司海口

至鳳凰山銅盆山防東南颶作晚收中界山拋泊過一日至盤石衛但見天霧在中界山正北島拋泊過一日南風行使至晚收北門千戶所要尋捕魚小列船送過一日南風往北行使過利洋鷄籠山等潮可行至松江港松門衛東港拋泊見捕魚船十五六隻便是港口過一日等潮開船至台州海門衛東洋山晚收拋泊過一日離温州望北行使晚到桃青千戶所聖門口拋泊過一日開洋至大佛頭山屏風山至澗跳千戶所長亭巡檢司要水手魚船過一日至羅漢堂山到石浦千戶所東門拋泊要水手送過一日至定海衛放回金鄉衛盤石衛要稍水手離石浦港後門出過銅瓦山後沙洋半

邊山党公爵溪千戶所望北行使至青山門亂石礁洋至前倉千戶所雙膺港騎頭巡檢司前拋過至大嵩千戶所過家門山招寶山進定海港定海衛南門拋要稍水船送燒總福娘娘廟祭奠開洋望北行使至遮口山黃公洋至烈港千戶所海寧衛東三姑山望北行使若至茶山低了至金山衛東海灘松江府上海縣海套水淺望東南行使過晚拋船等潮過半日大七山小七山過太倉寶塔望東北行使過兩日兩夜見黑水洋南風使船一日見綠水瞭見海內懸山一座便是延真島至靖海衛口淺灘可預避之

按元時海道自平江劉家港入海經通州海門縣黃連

沙嘴萬里長灘開洋沿山嶼抵淮安路鹽城縣歷海寧
 府東海縣又經密州膠州界放靈山洋投東北行路多
 淺沙旬月始抵成山計自上海至直沽楊村馬頭凡一
 萬三千三百五十里其後再變自劉家港出楊子江開
 洋落潮東北行離萬里長灘至白水綠水經黑水大洋
 轉成山西行過劉家島入沙門島放萊州大洋抵界河
 至直沽其道差有三變自劉家港入海至崇明三沙放
 洋向東行入黑水大洋直取成山轉西至劉家島入沙
 門放萊州大洋至直沽如遇風順由浙西至 京師不
 過旬月而已其道徑便

續文獻通考卷之四十一

續文獻通考卷之四十一

皇明進士雲間王圻纂輯

國用考 賑恤

宋

高宗紹興三十一年成都府路旱詔降僧牒四百道充糴
 本措置賑濟

孝宗乾道三年遣使賑兩浙江東饑 四年賑綿漢等州
 饑尋以饒信及建寧府等州饑遣使賑濟降僧牒一百
 道付建寧府戶部降米五千石賑衢州饑荆南府僧牒
 二百道衢州一百道饒信米各三萬石雷州水賜十道
 詔諸路運司行下所屬將災傷處各選清強官遍詣地

頭盡行檢放或不實不盡有虧公私被差官并所差不
當官司並重作行遣其被水甚處令監司守臣條具合
措置存卹事件聞奏 知温州趙與可以支常平錢五
百貫并係省錢五百貫賑給被災人戶自劾上曰國家
積常平米正爲此也可赦罪 五年詔去歲災傷州郡
流移人令常平司所在收恤賑給 九年楚州饑賜米
五千石賑之 是年賑饒州饑上因覽知州王秬賑濟
條畫言饑歲民多遺棄小兒命付諸路收養如錢物不
足可具奏來于內藏支降 八年四川水命賑之 九
年台州饑命賑之 時臣寮言訪聞今歲旱傷非特浙
東被害如江西諸州例皆闕雨禾稻不收而贛吉二州

尤甚江東之太平廣德淮西之無爲軍和州多是先被
水患繼之以旱自今民已艱食其間州郡或有諱言境
內災傷不即申陳致失檢放條限或有雖曾申聞措置
賑濟事件朝廷未與行下切念救荒之政譬如拯溺救
焚勢不可緩今欲從朝廷專委逐路官疾速巡歷災傷
去處如委係失收不曾檢放或檢放不實者仰將今年
苗米依合減分数權行倚閣令候來年秋熟帶納其有
和糴米斛拋降馬料及諸色科買並權與住罷一年應
合賑糴賑濟去處許提舉官將一路見管常平義倉米
通融撥借應副其有諸州已條畫到措置賑濟事件朝
廷速降指揮廢幾官吏便可奉行百姓早被實惠詔從

之 淳熙七年姚述堯進對今歲旱傷賑恤之政當務
寬大上曰國家儲蓄本備凶歲捐以予民朕所不惜
九年賑兩浙饒州饑 十年賑京師饑 十三年賑利
州路饑 十五年賑臨安府饑與諸州水災
寧宗慶元初趙汝勣知當塗時歲饑穀貴乃開倉散米萬
斛一邑獲全事聞詔他郡依汝勣賑恤法 五年以久
雨民多疾疫命臨安府賑恤之 六年建寧府嚴衢
婺饒信南劍州水常潤揚通泰和州江陰軍旱賑之
嘉泰元年詔賑被火貧民 是歲浙西江東兩淮利州
路旱賑之仍蠲其賦 四年命臨安府賑焚室 時葉
筠知南劍州州貧生子多不舉筠請立舉子倉賑給之

開禧二年發米賑濟貧民 嘉定元年詔臨安府賑
濟流民 是年又出米二十萬石賑江淮流民 二年
出內庫錢十萬緡為行在貧民棺槨費又賜行在諸軍
死者棺錢 八月出米十萬石賑兩淮流民 三年臨
安紹興府嚴衢州大水賑之 四年命臨安府賑給病
民賜棺錢 六年兩浙諸州大水賑之 七年出內帑
錢賑臨安府貧民 八年出米六萬石賑糶臨安府貧
民 七月又出米三十萬石賑糶江東饑民 十年詔
江東提舉司出米十萬石賑給貧民 十一年詔湖州
賑卹被水貧民 十五年詔江西提舉司賑卹旱傷州
縣 十二月詔出米五萬石賑臨安府貧民 十六年

正月命淮東制置司賑濟山東流民。是年詔以米五萬二千五百石賑道州饑。九月詔江淮諸司賑恤被水貧民。十七年命臨安府賑糶貧民。四月詔廬州賑糶饑民。時知廣德軍耿秉田因歲歉發倉賑濟活饑民萬餘。自劾矯制之罪。上聞之。賜璽書褒異。袁甫進區處流民故事曰。臣竊爲區處流民之策。惟富弼之法。最爲簡要。所謂簡要之策。惟曰散處其民於下。而總提其綱於上而已。竊聞金陵諸邑流民羣聚。皆來自淮西。荷戈持刃。白晝肆掠。動輒殺傷。沿江出兵驅之。其在句容之境者。輒入金壇。若宣城。若池陽。若當塗。所在蟻聚。剽劫成風。逃亡之卒。皆入其黨。江南姦民率多附和。

目前勢已若此。冬杪春初。日月尚長。蔓延不已。各將潰裂。四出不可收拾。臣愚欲乞朝廷行下督府及諸閫與。凡安撫總漕諸司。作急措置。自一路而推之。諸路由諸路而推之。諸郡每處流民。隨所在分之。凡贍養之費。惟分則易供。居止之地。惟分則易足。此非臣之臆說也。弼擇所部五州。勸民出粟。得十五萬斛。益以官廩。隨所在貯之。又擇公私廬舍十餘萬區。散處其人。以便薪水。粥之所作。可謂委曲詳盡矣。今日果能推行此策。非但勸民出粟而已。或撥上供之數。或撥椿管之錢。或乞科降則上下當相視如一家。或請團給。則彼此當聯絡爲一體。而所謂團給者。又不止一途而已。能勞苦者庸其力。

有伎藝者食其業其間有爲士者則散於庠序爲商者則使之資遷心有所繫而姦無所萌此皆分說也分之愈多則養之愈易而其要在督府制閹以及總漕諸司爲之領袖而已是故民貴乎分而權貴乎合所謂散處其民而總提其綱者正謂此也臣願朝廷使長吏任責一如青州故事流民幸甚宗社幸甚

理宗寶慶元年滁州大水詔撥會子三千緡米千六百石賑恤被災之家二年浙東大水汪綱發粟三萬八千餘緡錢五萬賑給之又蠲租六萬餘石疲瘠頓蘇越有經總制稅名四十一萬其中二十五則紹興以來虛額也前後帥懼負殿以修奉攢宮之資僞增綱撫其實以

聞詔免九萬五千緡而宿弊因是著明紹定二年五月詔成都潼州路旱歉令制置司及各路監司疾速措置賑恤務要實惠及民仍考察郡縣奉行勤惰以聞從臣寮請也十月詔賑贍台州被水之民三年以雪寒詔出封樁庫緡錢三十萬賑恤臨安貧乏之民五年三月以陰雨詔出豐儲倉米五萬石以紓民食是年臣寮奏戒飭諸道常平使者遵用淳熙詔令每歲覈州縣豐歉分數或災傷重處即與賑恤不許隱蔽不實違者罪之六年八月詔令江淮制置大使司給米麥一百萬斛分撥三京歸附州縣委官置務賑濟端平三年詔有司賑恤流民是年紹州英德府大水詔令

本司多方措置賑恤 嘉熙元年詔准襄避地流民饑寒可念令沿江諸郡委官賑濟 五月詔出內庫緡錢二十萬給被災之家 三年詔出封樁庫祠牒三百道下江東憲司賑饒信南康三郡旱傷之民 四年詔出封樁庫緡錢三十萬賑臨安府貧民 淳祐二年詔出封樁庫十七界楮幣十萬賑贍紹興處婺水滂之民 三年詔以雪寒出封樁庫十八界楮幣二十萬賑臨安府細民 七年詔監司守臣宜亟講荒政以賑乏絕稅租有合蠲放者覈實以聞 乾道五年初閩人生子貧者多不舉紹興中朱文公請立舉子倉淳祐中趙汝愚帥閩推廣其意括絕沒之田產召佃輸租仍發糶本建

倉收儲遇受孕五月以上者則書于籍逮免乳日人給米一石三斗至是詔賜常平錢米賑給之 是年詔賞福建路監司州郡所上官民之家濟糶者九九人補轉官資有差 十年十二月詔江浙沿江郡縣刷其流民口數於朝廷樁管錢米內賑濟仍許於寺觀及空閒官舍居住 十一年十一月詔江東西湖南北福建二廣有災傷瘴癘去處雖已賑恤猶恐州縣奉行不虔可令監司守臣體認德意多方救拯詔隆冬疑寒出封樁庫十八界官會子二十萬貫賑之 十二年出封樁庫十八界楮四十萬賑行在軍民 七月上諭輔臣嚴州水勢可駭移撥之米當賑濟不當賑糶謝方叔奏衢婺台

亦多漂蕩宜一體救恤 是月以諸路水災遣使分郡賑恤 寶祐五年詔朕軫念軍民無異一體常令天下諸州建慈幼局平糶倉官藥局矣又給官錢付諸管置庫收息濟貧乏奈何郡守奉行不謹所惠失實朕甚憫焉更有斃於疫癘水災與夫歿於陣者遺體暴露又不忍聞也可行下各路清強監司嚴督諸守臣宣制安撫嚴督主兵官並要遵照元降指揮如慈幼則必使道路無啼饑之童平糶則必使小民無艱食之患官藥則劑料必真修合必精軍庫收息則以時支給不許稽違務要公平不許偏徇庶若民若軍皆蒙實惠 十一年正月詔賑荆南饑 景定二年十月詔物價未平出封樁

庫楮幣二十萬賑二衛諸軍出豐儲倉米五萬石賑都民 三年二月都省言臨安安吉嘉興屬縣水澇溺死頗衆詔各郡守臣給錢埋瘞 時馬光祖知榮王與芮府有積粟三徃見之王以他辭光祖乃卧于容次王不得已見馬光祖厲聲曰天下誰不知儲君爲大王子今民饑欲死不以此時收人心乎王以廩虛辭光祖探懷中出片紙曰某庄某倉若干王語塞遂許以三十萬光祖遣吏分活饑民甚衆

度宗咸淳元年趙與檣知建德縣民以旱澇告請於朝得粟一萬斛以濟尋遷建德府暨解任以所積俸錢并堂饌直役錢預爲建德縣人戶代輸咸淳四年茶租其救

續文獻通考 卷之四十一
荒之政民尤被其惠

遼

太宗天顯五年七月賜平民布帛 會同二年二月詔賜
在京吏民物 三月大賚百姓

景帝寶寧八年三月遣五使廉問四方鰥寡孤獨貧乏失
職者賑之

聖宗統和元年九月以東京平州旱蝗詔賑之 八年四
月以歲旱諸郡艱食賑之 十一月以吐谷渾民饑賑

之 十五年二月勸品部富民出錢以贍貧民 四月
發義倉粟賑南京諸縣民 十六年四月賑崇德宮所

隸州縣民之被水者 二十五年十二月賑饒州饑民

二十八年八月賑平州饑民 二十九年三月南京

平州水賑之 開泰元年十二月賑奉聖州饑民 二

年七月詔以敦睦宮子錢賑貧民 五年四月賑韶州

民 六年十月南京路饑輓雲應朔弘等粟賑之 七

年四月賑川饒二州饑又賑中京貧乏 八年楊佖賑

南京饑鬻子者贖之民大悅 太平六年二月南京水

遣使賑之

興宗景福元年賑薊州黃龍府饑民 十五年十一月賑

南京貧民

道宗咸雍二年七月以歲旱賑山後貧民 清寧初耶律

獨攬以東路饑奏賑之 四月賑西京應州朔州饑民

七年十一月賑饒州饑民 八年歲饑賑思蔚順惠
義惠饒易中京及中興等州饑民 太康元年正月賑
雲州饑 二月祥州火遣使恤災 四月賑平州平灤
南京貧民 九月以南京饑免租仍出錢粟賑之 二
年正月賑黃龍府饑 四年正月賑東京饑 五年十
月賑平州貧民 七年十一月詔歲出官錢賑諸宮分
及邊戍貧民 太安二年出粟賑遼州上京中京軋顯
成懿等州貧民 三年正月出錢粟賑南京貧民 二
月發粟賑中京饑 四月賜中京隈烏右部貧民帛詔
出戶部司粟賑諸路流民及義州之饑 七月出雜帛
賜興聖宮貧民 四年賑上京及平錦來三州饑 又

賜蘇吉復淶鉄慶祖春等州貧民 七年二月詔給渭
州貧民耕牛布絹 八年十月賑西北路饑 十一月
以通州潦水害稼遣使賑之 九年賑西北路貧民
十年閏四月賜西北路貧民錢 壽隆元年正月賑奉
聖州貧民 三月賜東北路貧民絹 二年二月賑達
麻里別古部賜左右二皮室貧民錢 四月賑西地邊
軍 三年二月南京水遣使賑之 五年賑遼州南北
二紉 六年二月出絹賜五院貧民
天祚帝乾統三年正月賜貧民錢 四年十一月御迎月
樓賜貧民錢 六年二月出絹賜五院貧民

金

太祖收國七年正月詔前後起遷之民有懷土之心可令所在有司深加存恤衣食不足者官賑貸之

太宗天會元年九月發春州粟賑降人之徙上京者二年二月詔給宗翰馬七百匹田種千石米七千石以賑新附之民 四月賑上京路西北路降者及新徙嶺東之人 十月詔發上京路降者州民被秋潦者 又詔有司運米五萬石于廣陵以給南京渤海戍卒 十一月詔以米五萬石給撻懶實右廼 九年四月賑戍邊戶與邊軍資糧不繼者 十年二月賑上京戍邊猛安民 四月聞鴨綠江暴漲命賑徙戍邊戶在混同江者 七月賑太平路戍邊戶 十一年二月元帥府言承

詔賑軍士臣恐有司錢幣將不繼請自元帥以下有祿者出錢助給之詔曰官有府庫而取于臣下此何理耶其悉從官給

熙宗皇統元年九月詔賜鰥寡孤獨不能自存者人絹二疋絮三斤 二年賑熙河陝西路

世宗大定二年正月詔前工部尚書蘇保衡太子少保高思廉賑賜山東百姓粟帛無妻者具姓名以聞 三年五月賑山西路猛安謀克貧民給六十日糧 十一年正月命賑南京屯田猛安被水災者 九月命賑山東路胡察温猛安饑 十七年三月賑東京婆速曷速館三路尚書省奏三路粟不能周給命於鄰道取濟 十

月詔以羊十萬付烏古里石壘部畜牧收其滋息以予貧民 十八年閏六月賑西南西北兩招討司民及烏古里石壘部轉戶饑 十九年四月賑西南路招討司所部民 二十八年十一月詔南京大名府等處避水逃移不能復業者給與賑濟錢仍量地畝頃給以耕牛 二十九年時章宗已即位正月賜鰥寡孤獨人絹一疋米二石 十一月詔有司今後諸處或有饑饉令總管節度使或提刑司先行賑貸然後言 十二月賑寧化保德嵐州饑 時劉仲洙為定海節度使歲饑仲洙表請開倉未報先為賑貸有司劾之罪以贖論

章宗明昌三年五月尚書省奏近以山東河北之饑已委

宣差所至安撫賑濟復遣右三部司正范文淵前往視之 七月勅尚書省曰饑民如至遼東恐難處得食必有餓死者其令散糧官問其所欲居止給以文書命隨處官長計口分散令富者出粟養之限以兩月其粟充秋稅之數 四年賑河北諸路及河州饑 十二月令大興府于暖湯院日給米五石以贍貧者 承安二年十月大雪以米千石賜普濟院令為粥以食貧民 四年十月陝西軍戶戰死者給糧贍其家 五年三月命給米諸寺自十月十五日至次年十五日作粥以食貧民 十月勅京府州縣設普濟院每歲十月至明年四月設粥以食貧民 大安元年十二月詔平陽地震貧

民死者給葬錢五千傷者三千二年六月大旱下詔罪已賑貧民缺食者崇寧元年十月賑河東南路南京路陝西東路山東西路衛州旱災時福僧充遼東宣諭副使歲大饑出沿海倉粟先賑其民而後奏至寧元年正月賑河東陝西饑貞祐二年正月知大興府事胥鼎以在京窮民缺食者眾宜設法以救乃奏京師官民有能贍給貧人者宜計所贍遷官以獎勸之遂定權宜鬻恩例格如進官陞職丁憂人許應舉求仕官監戶從良之類入草粟各有數全活甚眾興定二年正月詔議恤賑天下窮民十二月諭有司以京師丐食死于祁寒者可憫其給以後苑竹木令居獲燠所

三年十月命有司葺開舍給薪米以濟貧民期明年二月罷俟時平則贍之以為常五年閏十二月發上林署粟賑貧民

元
京宗正大四年遣使安撫陝西路以牛千頭賜貧民五年十二月以陝西大寒賜軍士柴炭銀有差京兆鳳翔府司竹監退竹令分給之七年八月賜陝西死事之孤塩引及絹仍量材任使天興元年三月置局養無家俘民

元
凡元賑恤之名有二曰蠲免者免其差稅即周官大司徒所謂薄征者也曰賑給者給以米粟即周官大司徒所

謂散利者也然蠲免有以恩免者有以災免者賑貸有以鰥寡孤獨而賑者有以水旱疫癘而賑者有以京師人物繁湊而每歲賑糶者其爲制各不同

世祖中統七年首詔天下鰥寡孤獨廢疾不能自存之人所在官司以糧贍之 五年益都民饑驗口以賑 六年東平河間一十五處饑驗口賑之 至元元年又詔病者給藥貧者給糧 三年濟南饑以糧三千萬石賑之 七月以課銀一百五十錠濟甘州貧民 四年以錢糧幣帛賑東平濟南貧民鈔四千錠賑諸王只必帖木兒部貧民 九年勅以籍田所儲糧賑民不足又發近地官倉濟之 十年勅東京路運米二萬石賑高麗

御史臺臣言沒入 贓罰爲鈔一千三百錠詔有貧乏不能自存活者以沒入之贓賑之 是年賑米凡五十

四萬五千五百九十二石 十一年民饑發米七萬五千四百一十五石粟四萬五百九十九石以賑之 十二

年賑米三千七百四十八石賑粟二萬四千二百六石

十三年東平濟南泰安德州連海清河平灤西京等

州皆以水旱缺食賑軍民站戶米二十二萬五千五百

六十石粟四萬七千七百七十二石鈔四千二百八十二

錠有奇 十四年十二月以大都物價翔踊發廩萬石

賑糶貧民 是歲賑東平濟南等郡饑民米二萬一千

六百七十石粟二萬八千六百十三石 十五年賑天

下饑民米八萬八百九十石粟三萬六千四十石鈔二萬四千八百八十錠有奇 至元中拜降爲慶元路治中歲大饑狀累上行省不報拜降曰民饑如是而不賑之焉在其爲民父母即躬詣行省力請得發粟四萬餘石民賴之全活者甚衆 十六年以江南漕運舊米賑軍民之饑者 十八年發鈔及金銀以給貧民 十九年江南民饑真定以南民多流移和禮霍孫請所在官司發廩以賑從之 二十一年建寧米價踊貴浙西官慰使史弼發米十萬石以平價糶之而後聞于省省臣欲增其價弼曰吾不可失信寧輟吾俸以足之省不賦奪益出十萬石建民賴以不饑 二十二年賑糶京師

貧民命于京城各設三舖遣官吏發倉粟減其直以賑糶軍民凡白米每石減鈔五兩南粳米減三兩歲以爲常 二十五年中書省臣言杭蘇湖秀四州復大水請輟上供米二十萬石賑之帝是其言 二十七年以浙東諸郡河間路饑俱給九十日糧寧國等路大水民流移者四十五萬八千四百七十八戶凡賑粟五十八萬二千八百八十九石 二十八年杭州平江等五路溧陽太平徽州廣德州鎮江五路江南湖廣大都饑發粟賑之 三十年詔各處孤老凡遇寬恩人給布帛各一成宗元貞元年以江西饑命廉訪使官賑之 四月增京師兩城賑糶米肆上以京師米貴又廣世祖之制設三

十肆發米七萬餘石糶之其後每年增糶多至四十萬石二年賑福建廣西江西道饑大德元年六月以糧四千餘石賑廣平路饑民萬五千石賑江西被水之家七月以米九千四百餘石賑寧海州饑十月以揚州淮安路饑韶州南雄建德温州大水並賑之十一月發廩賑淮東饑三年發臨江路糧十萬石賑建康等處饑二月以浙西嘉興江陰江東建康溧陽池州水旱並賑恤之四年二月發粟十萬石賑湖北饑二月以糧二萬石賑寧國太平九月建康常州江陵饑民八十四萬九千六百餘人給糧二十二萬九千三百九十餘石以濟之五年六月平江等十有四路

大水以糧二十萬石隨各處時值賑糶七月以米八萬七千餘石賑被水災者以糧千石賑遼陽省大寧路十八月以粟三萬石賑平灤等處被災者六年二月京師民乏食命省臺委官計口驗實以鈔十一萬七千一百餘錠賑之六月湖嘉杭廣德饒太平婺州慶元紹興寧國等路饑賑糧二十五萬一千餘石七年二月令河南省賑恤流民五月以糧五萬五千石賑糶太原等路高唐等州饑以糧三十五萬四千石賑糶平江等十六路饑六月以糧萬石賑糶武岡路饑浙西路饑民一十四萬賑糧一月七月以糧萬石賑糶常德路饑九年三月以濟寧去歲傷稼常寧州饑賑恤之

四月遣使以鈔四千錠米二萬五千餘石賑大同路被災者以汴梁歸德安豐去歲被災潭郴州桂陽東平等路饑並賑恤之 五月寶慶路饑發粟五千石賑之 大七月以米四千石賑西華澤州以糧五萬一千六百石賑鞏潭柳等八郡 十年二月發陵州糧二千餘石賑禹州饑 三月以米萬石賑任城饑 七月以米七萬七千八百石賑鞏武昌興國黃州饑 八月以米七千餘石賑鞏成都等縣 十月發米萬石賑江州饑 十一月以米二萬一千餘石賑鞏揚州饑 十一年武宗 十一月以米二萬一千餘石賑鞏揚州饑 十一月武宗 六月江浙饑賑糧三月 七月以江浙湖廣江西屬郡饑詔行省發粟賑之安西等郡饑以糧二萬八千

石賑之江浙湖廣江西河南兩淮屬郡饑於鹽茶課鈔內折粟遣官賑之 又詔富家能以私粟貸者量授以官 八月以江東郡縣饑遣官賑之江南饑以十道廉訪使所儲贖罰鈔賑之東昌汴梁唐州延安潭沅歸澧興國襄陽杭州平江各路饑發粟賑之 十一月廬龍灤河延安昌黎撫寧等縣饑給鈔千錠賑之杭州平江等處大饑發糧五十萬一千一百石賑之 武宗至大元年正月紹興台州慶元廣德建康鎮江六路饑戶四十六萬有奇戶月給米六斗 二月汝寧歸德饑給鈔萬錠賑之益都濟寧般陽濟南東平泰安大饑遣使賑濟為鈔十萬二千二百三十七錠有奇糧一萬

九千三百四十八石淮安等處饑以兩浙鹽引十萬貫粟賑之 六月大都饑發官廩賑糶江浙行省饑賑米五十三萬五千石鈔十五萬四千錠麵四萬斤又流民戶三十三萬九百五十有奇賑米五十三萬六千石鈔十九萬七千錠鹽折直為引五千益都饑以朱汪利津兩倉粟賑之河南山東饑以兩道沒入贖鈔賑之 七月濟寧水以鈔五千錠賑之真定淫雨發米一萬七百石賑之 十月大都饑以米十萬石賑糶中書省臣請以湖廣米十萬石貯于揚州江西江浙海漕三十萬石內分五萬石貯于朱汪利津二倉以濟山東饑從之 閏十一月大都米貴發廩十萬石賑糶 二年御史臺

臣言今年山東大饑流民轉徙乞以本臺沒入贖鈔萬錠賑之制可 三年九月內郡饑詔尚書省如例賑恤上都民饑發粟萬石賑糶 十月山東徐邳等處水旱以御史臺沒入贖鈔四千餘錠賑之 四年仁宗已發即位京倉米賑糶 六月濟寧東平歸德高唐徐邳諸州河間陝西諸縣水旱賑之 七月江陵水太原河間真定順德彰德大名廣平等路德濮思通等州傷稼大寧等路隕霜勅有司賑恤 十一月勅置京城米舖四十所白平糶八百石以大賑貧民 仁宗皇慶元年二月賑山東流民通澠州饑賑糧二月七月濱州饑出利津倉米二萬石賑糶寧國路涇縣水

賑糧二月 延祐元年歸州并武昌饑發米賑糶漢陽
思州饑沅陵廬溪武清岳武岡常德道州及肇慶武昌
建德南康建康江州袁州建昌贛州杭州撫州安豐等
路大水發廩賑糶 是時伯魯為甘肅行省平章政事
米價騰湧陸輓一石費二百緡乃為經畫計所省至四
百餘萬緡自是諸倉盛溢歲饑則發粟賑之春缺種則
貸之于是兵食既足民食亦足 二年勅江南行臺駐
罰鈔賑恤饑民 二月晉寧宣德等處潭江沅建昌奉
元龍興吉安南康臨江袁州撫州江州建昌贛州南安
梅州辰州興國潭州岳州常德武昌等路南澧州等饑
發廩賑糶畿內澠州昌平香河寶坻潭州金州永州茶

陵等處各被水災出所貯米賑糶 三年三月命行臺
廉訪司以見貯賑鈔賑河南流民復發廩賑遼陽蓋州
及南澧州潭永保慶桂陽澧道沅等路饑 四年發廩
賑汴梁揚州河南淮安重慶順慶襄陽饑 五年三月
勅以江城屯田米賑淨州平地等處流民 四月遣官
分理各部流民給糧賑濟 五月給糧德慶鞏昌隴西
被災者 六年五月命京師諸司官吏運糧輸上都興
和賑濟蒙古流民 九月發粟賑濟寧東昌高唐德州
濟南益都般陽揚州等路饑 七年英宗即位 四月賑
大都淨州等處流民 五月汝寧霖雨傷禾麥發粟五
千石賑糶 八月發米十萬石賑糶京師貧民賑廣東

新州饑

英宗至治元年正月以蘄水縣饑賑糧三月 二月發粟
十萬石賑糶汴梁歸德饑又以鈔二萬五千貫粟五萬
石賑河南安豐饑 三月賑寧國益都饑 四月江州
贛州臨江袁州建昌饑發粟四萬八千石賑之廣德路
旱發米九千石賑糶 五月賑益都膠州濮州南恩新
州饑 九月京師饑發粟十萬石減價糶之 二年正
月發米三十九萬五千石賑山東保定河南汴梁歸德
襄陽汝寧等處饑以米十萬石賑糶潮州饑 二月真
定遼陽延安等路饑賑糧一月京師饑發粟二十萬賑
糶河南陝西河間保定彰德路饑發粟賑之 六月廣

元路歸谷昭化二縣饑官市米賑之 七月廬州六安

縣饑命有司賑糧一月 三年禹城縣人邢著程進出

粟以賑饑民命有司旌其門 二月京師饑發粟二萬

石賑糶 三月平江路嘉定州饑發粟六萬石賑之

十一月泰定帝即位袁州路宜春縣鎮江路丹徒縣饑賑糶

米四萬九千石 十二月澧州歸州饑賑糶米二萬石

泰定帝泰定元年糶米二十萬石賑京師貧民集州臨洮

狄道冀寧石州離石寧鄉袁州龍慶延安吉安杭州大

都及甘肅河渠彰德汴梁等路順德等二十一郡饑皆

發粟賑之又建昌紹興廣東武昌信州泉州南安贛州

等路饑賑糶有差 二年肇慶等處饑賑糶有差又二

月保定路饑賑鈔四萬錠糧萬五千石雄州歸信諸縣
 河溢被災者萬一千六百五十戶賑鈔三萬錠薊州寶
 坻縣慶元路象山諸縣饑賑糧二月大都鳳翔寶慶衡
 潭全諸路饑賑糶有差 四月以鎮江諸郡饑賑糧五
 萬餘石隴西漢州秦州饑賑鈔三萬錠 五月平江等
 十二郡饑賑糶米三十二萬五千餘石鞏昌臨洮饑賑
 鈔五萬五千錠 六月濟寧等十二郡饑賑糶米七萬
 餘石 七月梅饒鎮江邠諸路饑賑糶米二萬餘石
 八月南恩州瓊州臨江府歸德路饑賑糧有差建昌衡
 岳饑賑糧米一萬三千石 九月瓊州南安德慶諸路
 饑賑糧鈔有差 十一月京師饑賑糶米四十萬石內

郡賑鈔十萬錠米五萬石河南諸郡流民就食通漕二
 州命有司有恤杭州路饑賑糧一月常德路饑賑糧一
 萬一千六百石 十二月濟南延州饑賑鈔三千五百
 錠惠州杭州饑賑糶有差 三年大都路歸德府屬縣
 饑共賑糧十一萬六千石河間保定真定饑賑糧四月
 建昌饑賑糶米三萬石 三月永平等路饑賑鈔六萬
 六千餘錠寧夏等路饑賑糧二月 七月賑永平奉元
 鈔七萬賑濠州饑民麥三萬九千餘石 八月杭州火
 賑糧一月 十月京師饑發粟八十萬石減價糶之
 十一月瀋陽遼陽大寧等路及金復州饑賑鈔五萬錠
 廣寧路霖雨傷稼賑鈔三萬錠永平明州水賑糧五月

給死者鈔二十貫保定路饑賑米八萬一千五百石懷
慶路饑賑鈔四萬錠 四年正月遼陽諸郡饑賑鈔十
八萬錠 二月永平饑賑鈔三萬錠糧二月 三月大
寧廣平屬縣饑賑鈔二萬八千錠河南行省諸州縣及
建康屬縣饑賑糧有差 四月河南奉元及通順檀薊
諸郡縣饑賑糧有差 六月廬州路饑賑糧七萬九千
石 九月保定真定饑賑糧三萬石鈔萬五千錠建昌
贛州惠州諸郡饑賑米四萬四千石 十月大都路水
賑糧二十四萬九千石衛輝獲嘉等縣饑賑鈔六十錠
十月減價糶京倉米十萬石以賑貧民 十二月發
米三十萬賑京師饑 致和元年正月河間真定順德

諸路饑賑鈔萬一千錠三月普寧衛輝泰安州饑賑鈔
四萬八千三百錠冀寧路平定州饑賑糶米三萬石
五月燕南山東東道及奉元大同河間河南濮州等處
饑賑鈔十四萬三千餘錠陝州屬縣饑賑糶米五千石
奉元延安饑賑鈔四千八百九十錠 天曆元年張思
明爲江浙行中書省左丞會陝西大饑中書撥江浙益
運司歲課十萬錠賑之吏白周歲所入已輸京師當發
回中書省思明曰陝西饑民猶魚在涸轍往返踰月是
索之枯魚肆也其以下年未輸者如數與之有罪吾當
坐朝廷黜之

文宗天曆二年正月以鈔五萬錠賑陝西饑又賑大都路

涿州房山范陽等縣饑民糧二月又以糧一萬三千石
賑糶大同路 二月永平雲需貴赤衛饑賑糧有差又
大同饑賑糶糧萬三千石 四月陝西諸路饑民一百
二十三萬四千餘口諸縣流民又數十萬先是賑之不
足行省復請商賈入粟中塩納粟補官及發孟津食糧
萬石及河南漢中所貯官租以賑從之 又河南府路
饑食人肉事覺者五十一人饑死者一千九百五十人
饑者二萬七千四百餘人乞弛山林川澤之禁聽民採
食行入粟補官之令及括江淮僧道餘糧以賑從之
江浙行省言池州廣德寧國太平建康鎮常湖慶元諸
路及江陰州饑民六十餘萬戶當賑糧一十四萬三千

餘石從之 又大都興和順德大名彰德懷慶衛輝汴
梁中興諸路泰安高唐曹冠徐邳諸州饑民六十六萬
六千餘戶賑鈔九萬錠糧萬五千石大都宛平保定涿
州易州賑糧一月靖州賑糶糧九千一百石 五月陝
西行省言鳳翔豐樂八屯萬戶府軍民饑者共二十
萬餘人賑以官鈔萬五千錠 六月命中書集老臣議
賑荒之策時陝西河東燕南河北河南諸路流民十萬
死亡相半命所在州縣官以便宜賑之 至順元年以
江浙大水民饑詔行省以入粟補官鈔三千錠及勸出
粟十萬石賑之是歲被災者多尤加賑恤 二年別兒
怯不花爲江浙行省左丞相行至淮東聞杭州大火揮

涕曰是吾不德累杭人也疾馳赴鎮即下令錄被災者六萬三千餘戶戶給鈔二錠焚死者亦如之人給月米三斗幼稚給其半又請減酒課錢千二百五十緡織紡減原額之半漆稅權停一年事聞朝廷從之又浙西諸路北年水旱饑民八十五萬餘戶中書省臣請令官私儒學寺觀諸田佃民從其主假貸鈔穀自賑餘則勸分富家及入粟補官仍益以本省鈔十萬錠并給僧道度牒一萬道從之湖州安吉太湖溢漂民居二千八百九十戶溺死一百五十七人命江浙行省賑恤之三年正月賑糶京師貧民米五萬石五月復如之是歲賑恤被災者如二年

順帝元統元年以江浙大旱發義倉糧募富人入粟以賑之二年杭州鎮江常州嘉興松江江陰水旱疾疫勅有司發義倉糧賑之共五十七萬二千戶五月中書省臣言江浙大饑以戶計者五十九萬五百六十四請發米陸萬七百石鈔二千八百錠及募富人出粟發常平義倉賑之并存海運糧七十八萬三百七十石以備不虞詔從之八月南康路諸縣饑以米十二萬二千石賑糶之至元元年沅州等處饑賑米二萬七千七百石是年江西饑賑糶米七萬七千石二年台州路及松江上海饑各發義倉募富人出粟賑之湖廣沅州江西撫州等路饑各發米賑糶是年江州諸縣饑總管

王大中貸富人粟以賑貧民而免富人雜徭以為息約年豐還之 三年大都南北兩城設賑糶米舖二十處又賑各處民饑者 四年賑京師河南北被水災者又賑龍興南昌臨沂等處饑民 五年各處被災者多賑恤亦廣 六年正月邳州饑賑米二月 二月增設京城米舖從便賑糶 福寧州大水京畿五州十一縣水災每人戶賑米二月 三月山陽刑臺縣饑賑鈔五千五百錠 至正元年正月湖南諸路饑賑糶米十八萬九千七十六石 二月濟南濱州沾化等縣饑賑鈔三千錠河間莫滄等處饑陽阜平安喜靈壽四縣饑共賑鈔五萬五千錠又大都寶城饑賑米兩月 三月大

都路涿州范陽房山般陽路長山彰德路安陽等縣饑共賑鈔二萬九千錠 四月彰德饑賑鈔五千錠 六月揚州路崇明通泰等州海溢溺死千六百餘人賑鈔萬一千八百二十錠 二年正月大同饑人相食運京師糧賑之又順寧保安廣平磁威州饑共賑鈔六萬錠 二月安陽臨漳等縣及大名河間路饑共賑鈔八萬二千錠大同路渾源州饑賑鈔六萬二千錠糧二萬石 三月冀寧路饑賑糶米三萬石順德平鄉縣衛輝路饑杭州火共賑鈔四萬錠 八月冀寧又饑復賑糶米一萬五千石 九月睢陽縣民饑賑糶米萬三千五百石 三年二月新鄭高密二縣地震寶慶路饑判官文

殊奴以所受勅牒貸官糧萬石賑之 十二月膠州及屬邑高密地震河南等處民饑賑糶米十萬石 四年閏二月永平澧州等路饑賑之 八月山東霖雨民饑發倉賑之 十一月以各郡縣民饑不許抑配食鹽復令民入粟補官以備賑濟 十二月又賑東昌濟南般陽慶元撫州饑民 五年三月大都永平鞏昌興國安陸等處并桃溫萬戶府各翼人民饑賑之 四月汴梁濟南邠州瑞州等處民饑賑之募富戶出米五十石以上者旌以義士之號廬州張順興出米五百餘石賑饑旌其門 六年四月發米二十萬石賑糶貧民 七年發米二十萬石賑糶貧民 四月河東大旱民饑遣使

賑之 十二月晉寧東昌東平思州高唐等處民饑賑鈔十四萬錠米六萬石 八年平江松江水災給海運米十萬石賑之 是年山東大水北邊軍民饑賑之 十一年二月遣使賑南北被寇人民死者鈔五錠傷者三錠燬所居屋者一錠 十二年大名路開滑濬三州元城十一縣水旱虫蝗饑民七十一萬六千九百八十口給鈔十萬錠賑之 十四年詔被災殘破之處令有司賑恤 十五年上都民饑賑糶米二萬石大同民饑出糧一萬石減價糶之

紅帖糧 成宗大德五年始行初賑糶糧多爲豪強嗜利之徒用計巧取弗能周及貧民於是令有司籍兩京

貧乏戶之數置半印號簿文帖各書其姓名口數逐月對帖以給大口三斗小口半之其價視賑糶之直三分常減其一與賑糶並行每年撥米總二十萬四千九百餘石閏月不與焉

皇明

國朝凡遇水旱災則蠲免租稅或遣官賑濟遇蝗蝻生發則委官打捕皆隨時與地而異其法凡各處田禾遇有水旱災傷所在官司踏勘明白具實奏聞

太祖祖訓凡天下承平四方有水旱等災驗國之所積於被災去處優免稅糧若豐稔之歲雖無災傷亦當驗國所積稍有附餘擇地瘦民貧處優免之特不爲常例

凡賑濟洪武十八年令災傷去處有司不奏許本處耆宿連名申訴有司 二十五年令山東災傷去處每戶給鈔五錠 二十六年令天下有司凡遇歲饑先發倉廩賑貸然後具奏 二十七年定災傷去處散糧則例大口六斗小口三斗五歲以下不與

成祖永樂二年定蘇松等府水滄去處給米則例每大口米一斗六歲至十四歲六升五歲以下不與每戶有大口十口以上者止與一石其不係全災內有缺食者原定借米則例一口借米一斗二口至五口二斗六口至八口三斗九口至十口以上者四斗候秋成抵斗還官 六年令福建瘟疫死絕人戶遺下老幼婦女兒男有

司驗口給米稅鹽糧米各項暫且停徵待成丁之日自行立戶當差八年令被災去處人民典賣子女者官爲給鈔贖還二十二年令各處災傷按察司與巡按御史委官會同踏勘一不其不給金災內亦題金普恩宣宗宣德元年六月巡按湖廣御史朱鑑言洪武間各府州縣皆置東西南北四倉以貯官穀多者萬餘石少者四五千石倉設富民守之遇有水旱饑饉以貸貧民今各處有司以爲不急之務倉廩廢弛贖穀罰金掩爲已有深負朝廷仁民之意乞令府州縣修倉廩謹儲積給貸以時仍令布按二司巡按御史巡察違者罪之上諭戶部曰此祖宗良法美意比由守令不得人遂致

廢弛爾戶部亦豈能無過其如御史言違者從按察司監察御史劾奏八月巡撫侍郎周忱奏置蘇松等府濟農水次等倉以備賑恤

英宗正統五年令各衛所屯軍有因水旱子粒無收缺食者照缺食民人事例賑濟候秋成還官七年令各府州縣一應贓罰入官之物俱于年終變賣在官候秋成糴糧預備賑濟九年令揚州府江潮泛漲滄死人民量給鈔收瘞

景皇帝景泰四年山東河南江北直隸徐州等處災傷令所在問刑衙門責有力囚犯於缺糧州縣倉納米賑濟雜犯死罪六十石流徒三年四十石徒二年半三十五

石徒二年三十石徒一年半二十五石徒一年二十石
杖罪每一十一石笞罪每一十五斗

憲宗成化二年奏准今後若有侵欺賑濟銀糧或將官銀
假以煎銷均散爲名却挿和銅鉛給與貧民者一體解
京發落 六年 勅差堂上官二員往順天河間永平
真定保定等府災傷地方設法招撫賑濟如本處倉糧
缺乏許於附近通州天津涿州保定等處倉分量給及
搬運接濟其一應差徭俱暫優免 又奏准將京通二
倉糧米發糶五十萬石每秬米收銀六錢粟米五錢以
殺京城米價又將文武官吏俸糧預支三月 十二年
令各處巡按御史按察司官踏勘災傷係民田者會同

布政司官係軍田者會同都司官

孝宗弘治二年議准順天河間永平等府水災滄死人口
之家量給米二石漂流房屋頭畜之家給與米一石
十一年令災傷處所及時委官踏勘夏災不得過六月
終秋災不得過九月終若所司報不及時風憲官徇情
市恩勘有不實聽本部參究 三年五月定預備倉糧
州縣每十里以上積糧一萬五千石州縣官考滿稽其
備荒積穀多少以爲殿最 十四年令徐淮二倉各撥
米三萬石臨清倉撥四萬石分派附近被災處所賑濟
十七年議准蘇松災傷起運不前暫將一年在京各
衙門官員月糧米每石折銀八錢該在南京本色祿俸

每石照舊折銀七錢其南京各衙門官員俸糧每月除米一石折銀八錢其餘并南京各衛倉糧俱每石折銀七錢漕運糧米折銀二十萬石每石兌運七錢改兌六錢各解交納

世宗嘉靖元年 命出太倉銀二十萬運赴陝西蝗旱地方給賑 二年南北二京及山東河南湖廣江西俱旱災戶部孫交請留蘇松折兌銀粳白米兩浙鹽價許墾關鈔課應天缺官薪皂贖緩兼賑又請發太倉銀二十萬折漕米九十萬往賑從之 是年令將嘉靖三年分淨樂宮庫藏查盤節年所積香錢暫支二千兩賑濟湖廣地方旱災 五年奏准湖廣地方災傷將合屬各預


備倉原積穀米襍糧八十二萬石銀四萬兩并太和山嘉靖四五年分香錢見在實數十分內摘取六分酌量輕重賑濟 是年令鳳陽等處被災州縣稅糧照例除免應解物料暫且停徵兩廣鹽價留四萬兩接濟應用 六年奏准貴州災傷凡遇軍職犯該立功罪名者每一年納米十石令在衛閒住年限滿日許帶俸差操納過糧米存留備賑豐年停止 七年奏准北直隸八府災傷將本年分夏稅不分起運存留盡數蠲免其秋糧視被災分數照舊例行 又奏准河南災荒將所屬庫貯各項錢糧動支及留改折兌軍米十萬石賑濟被災府分饑民 又諭巡撫督令司府州縣將極貧人戶先

儘見在倉糧爲給賑若有不敷將各項官銀給發災輕
去處照例徵免輸納其允軍起運不可缺者將兩淮等
運司鹽價及各處別項徵納酌量派補運納如有不敷
仍將太倉官銀動支百餘萬兩派發送去以備代補起
運及賑濟二項支用 八年令撫按曉諭積糧之家量
其所積多寡以禮勸借若有仗義出穀二十石銀二十
兩者給與冠帶三十石三十兩者授正九品散官四十
石四十兩者正八品五十石五十兩者正七品俱免雜
泛差役出至五百石五百兩者除給與冠帶外有司仍
於本家監立坊牌以彰尚義 又題准災傷地方軍民
人等有能收養小兒者每名日給米一升埋屍一軀者

者給銀四分隣近州縣不得閉糴 又題准各災傷地
方守巡官查審流民大口給穀二三斗小口一二斗令
各速還原籍 九年令各處運司將在庫無礙官銀及
贓罰銀兩起時收買米穀別倉收貯委官守掌如遇饑
饉運司將極貧灶丁查照有司賑濟事例呈巡鹽御史
動支若有不敷各該有司查明與民一體賑濟 十年
令支太倉銀三十萬兩賑濟陝西 又奏准陝西災傷
重大令各州縣戒諭富室將所積粟麥照依時價糶與
饑民若每石減價一錢至五百石以上者給與冠帶一
千石以上表爲義門被災人民逃出外境者招集復業
倍與賑濟銀兩官給牛種隆冬時月饑民有年七十以

上者添給布一疋動支官銀收買遺棄子女州縣設法
 收養若民家有能自收養至二十口以上者給與冠帶
 州縣各於養濟院支預備倉糧設一粥廠就食者朝暮
 各一次至麥熟而止 十一年題准凡遇賑濟除各衛
 所上班官軍自有應得月糧外其原無糧餉軍餘或父
 母妻子極貧者與饑民一體給放 十四年令將太和
 山嘉靖十年以前香錢并均州貯庫銀二千六百餘兩
 盡數發湖廣布政司賑濟并補給祿糧月俸支用今後
 香錢除正用外果有羨餘歲歲儲積以備凶荒賑濟
 十六年題准今後凡遇地方夏秋災傷遵照勘災條例
 定擬成災應免分數先儘存留次及起運其起運不敷

之數聽撫按將各司府州縣官庫銀兩錢帛等項通融
 贖補及聽折納輕齋存留不足之數從宜區處不許徵
 迫小民有孤實惠 二十年吉囊寇山西 上命部臣
 給賑被虜郡縣 二十三年題准各處災傷漕運正改
 兌糧米四百萬石除原額折銀并薊州天津倉本色照
 舊外其餘本色以十分為率七分照舊徵運糧米三分
 折徵價銀每正兌米一石連蓆耗共徵銀七錢改兌米
 一石連蓆耗共徵銀六錢 二十九年令進京避虜貧
 難人口每各給蓆一領按日給米一升 三十一年令
 大同全災衛所預放官軍月糧兩月仍以該鎮煤稅鹽
 稅等銀及預備倉糧賑濟 是年秋又以黃河滄沒安



東縣治令該縣應派改兌折銀移派該府別州縣該縣
止派支運 三十二年奏准河南災盜地方量行折徵
兌改米五萬石于臨清倉支運三萬石德州倉支運二
萬石以補漕運之數 是年秋又議准徐淮水災減免
有田有戶之人應納稅糧五萬石其見在淮徐兩倉米
麥專給與無田無戶之人或不敷將淮徐附近府州縣
該起運兌改及各處見運到淮漕糧內照數截撥補給
又令發京通二倉挨陳稷粟米各一萬五千石賑濟河
間保定水災 又以河南寇災令發預備倉糧及事例
民兵等銀給賑仍從臨清倉動支漕運糧米三萬石裝
至衛輝府酌發被災各州縣收頓候明春青黃不接散

賑 又令勸諭殷實舖行給領官銀或不敷聽於臨清
倉折糧銀借支二萬兩作為糴本前往鄰近有收地方
收買糧米聽賑仍立為均糴之法照依原買腳價聽從
過得人戶易買自濟或互為質遷相兼接續賑糴 三
十三年題准淮鳳災傷將未完改兌糧待麥熟後止徵
本色 三十八年令發太倉銀六萬兩賑薊遼饑荒另
發銀五萬兩以給牛種 又令將新運停泊天津應派
通倉漕糧撥八萬石運山海關令山海以東應賑人戶
自來搬運其廣寧遼陽金復海蓋隔遠處於真保地方
易買贏頭就令遼陽見調薊州防秋步軍回日順帶馱
運備賑 四十三年議准淮揚徐州災傷改折嘉靖四

十四年應運四十三年分兌運改兌秋糧淮安所屬邳州海州鹽城山陽睢寧五州縣各准三分安東贛榆沐陽宿遷桃源清河六縣及徐州所屬蕭縣各准五分徐州并碭山沛縣豐縣及揚州府所屬興化縣各准六分徵銀解部備放官軍折色支用四十五年春正月賑畿內饑民在京者出太倉粟計口給濟在外行撫按就近給賑無致饑死

穆宗隆慶元年六月以霖雨壞民廬舍令五城御史以房號錢巡按御史以贓罰銀分賑之貧者每戶給銀五錢次三錢仍諭都察院左都御史王廷等督御史嚴加稽察使貧民得沾實惠直隸巡按王友賢奏被虜地方宜加賑恤而昌黎樂亭撫寧盧龍諸處請特免糧差以甦之報可二年五月禮科何起鳴奏陝西西安郡縣地震經月壓傷人民乞賜賑恤上曰地震重大所在被災人民朕深憫念賑濟一事戶部議處以聞于是戶部奏以本省織造羨餘銀八千八百三十兩并預備倉糧相兼賑濟得旨撫按官須委用得人給散有法俾小民得霑實惠七月以河間廣平保定真定順德大名等府災傷令有司查勘分數賑給有差戶科

劉繼文言有司衛所積穀備賑今怠於奉行而撫按躐于督責災傷日奏無益貧民乞勅撫按嚴覈有司軍衛奏報所積數目以俟稽查及將貯庫贓罰無礙官銀

糴穀備賑 詔從之 壬辰 詔戶部發太倉銀二萬兩遣於災重處亟行賑濟務使民霑實惠其餘被災地方行各該撫按官一體設法賑恤仍查災傷分数酌量蠲免以副 朕軫念元元之意 三年八月以直隸山西地方災傷 詔得贓罰銀兩賑給 東鹿縣大水壞廬舍溺死人民甚衆巡按房楠請發帑銀賑恤又乞將夏秋二稅食鹽絲絹及徭役等銀悉行停免 上用戶部議許動支隆慶三年分應解贓罰銀兩其蠲免錢糧行撫按酌議以蘇松二府水災給賑有差 丁卯戶科劉繼文以浙直山東災傷請量發帑銀遣官分賑仍留淮浙鹽魚及發臨德二倉粟米或令司府以開納銀

兩糴穀預備其漕運等糧并備用馬匹各照被災分数量准折徵俾小民得沾實惠禮部黃才敏亦請發德州倉見積米二三萬石以賑饑民令撫按扣贓罰銀兩抵補原額其他被災諸省如有倉儲皆如此例戶部覆奏如原議其起運存留等項錢糧應蠲免改折者候撫按酌議以聞報可 十月兩淮巡鹽御史李學詩以鹽場水災請扣留商人正鹽納銀每引一分挑河銀二萬兩賑恤竈丁從之 十二月湖廣撫按劉慤雷稽古等奏所屬府縣官積穀不如數者各奪俸貶秩有差 詔留兩淮鹽課銀二萬兩淮揚船銀三季以賑饑民 五年十月以江西南昌九江瑞州贛州南康饒州等府火災

命有司賑濟如例 六年五月以遼東鐵嶺等八城
火 命賑恤之

今上萬曆九年題准地方凡遇重大災傷州縣官親詣勘
明申呈撫按巡撫不待勘報速行奏聞巡按不必等候
部覆即將勘實分數作速具奏以憑覆請賑恤至於報
災之期在腹裏地方仍照舊例夏災限五月秋災限七
月內沿邊如延寧甘固宣大山東薊密永昌遼東各地
方夏災改限七月內秋災改限十月內俱要依期從實
奏報或報時有災報後無災及報時災重報後災輕報
時災輕報後災重巡按疏內明白從實具奏不得執泥
巡撫原疏致災民不霑實惠 十二年陝西巡按奏義


婦王氏輸粟一千石賑饑 上命給銀豎坊旌表 是
年議准以後地方災傷撫按從實勘奏不論有田無田
之民通行議恤如有田者免其稅糧無糧免者免其丁
口鹽鈔務使貧富一體並蒙蠲恤 二十二年 上覽
給事中楊東明饑民圖 命部臣議可蠲可賑者以聞
戶部條上以銀十五萬賑河南以漕糧十萬賑糶汝寧
等府又以漕糧十五萬平糶江北以米豆三萬六千賑
濟山東 上從之 福建道御史吳崇禮奏去歲霪雨
山東河南徐淮等處地方數千里橫罹水災夏麥秋穀
均無收穫充與河南徐淮接壤故其被災甚酷與徐淮
河南無異徐淮留米十五萬東充留銀米共約十餘萬

議者尤謂不足廼山東四府止留漕折銀二萬備倭米
豆三萬東省之災非減于徐淮河南也而賑之多寡懸
絕已甚頃者 皇上覽流民圖說從科臣楊東明之請
特發戶工二部錢糧 命寺臣鍾化民領 勅往河南
賑濟中州數十萬蒼赤固有更生之望矣然 皇上大
賚于中州而澤尚靳于東土豈謂東土之民流徙死亡
未至若中州甚歟臣昨由山東入京時目覩百姓流離
載道自南而北絡繹不絕憔悴稿枯不復似人形沿途
鬻妻賣子壯年之婦止易斗粟十歲之男僅易數錢棄
嬰孫于溝渠拋垂白于中路餓莩枕籍盜賊公行路人
相食一切不忍見之景象大都與東明所陳者相同自

古禍亂之興未有不始于失民心山東密邇畿甸爲第
一藩屏今雖饑餓切身然猶朝夕延頸以覬恩澤恐死
而不敢爲亂萬一人心渙散奸雄之徒乘隙鼓煽嘯聚
猖狂竊弄鋤挺于潢池中彼時豈能爲帑藏之乏置而
不問乎勢必議撫議勦無論所費不貲然驅良民而爲
盜陷赤子以入於刑 皇上愛民如子之本心恐亦大
有所弗忍者可不急救而豫防之乞亟發帑銀十萬及
時以賑山東庶嗷嗷待哺者不盡爲溝中之鬼而洶洶
不靖者亦可以消未萌之奸矣 兵科給事中張企程
奏中原饑饉異常山東淮揚有無礙官銀解部者乞令
使臣便宜給發章下戶部戶部奉民饑異常乞就近開

納以佐賑惠從之 三月 命遣使以 兩宮及 中
 宮銀五萬五百兩賑濟河南徐淮山東諸處 二十六
 年魏允貞題山西太原府災傷乞 賜賑恤 命加意
 糴穀備賑毋得怠玩 二十七年四月撫臣李頤奏寶
 坻三河縣災荒 命支各倉糧分投賑救 十一月巡
 按崔邦亮奏河南災傷 上曰中土洊罹災珍可憫免
 徵改折等項依擬分別仍行該地方官多方賑救不許怠
 緩坐視戶部覆奏上曰畿輔近地兵荒蝗涉相仍饑民
 流離可憫食糧即准給散仍着有司加意拊循多方救
 濟 二十九年戶部奏節序方嚴糶獨可憫自十一月
 初一起至次年正月終止煮粥濟貧民 十月二十八

日倉塲總督趙世卿奏山陝一帶夏旱秋霜米粒無收
 斗米價至三錢軍民久已枵腹日下十月將盡轉盼隆
 寒彼其凍餒而死者寧有數計伏乞 清燕之間常留
 省覽



續文獻通考卷之四十一終

續文獻通考



卷之十

山西太原府文德縣

文德縣志

卷之十

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

文德縣志 卷之十 文德縣志

